


CHL 2720.132

62

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE
SEP 20 1932

明史彙編卷一百一十四



明史藁

列傳第一百二十八

光祿大夫 經筵講官明史總裁戶部尚書加七級臣王鴻緒奉
敕編撰

楊鶴

楊嗣昌

丁啓睿

哈佛大學
圖書館
珍藏印

楊鶴字修齡武陵人萬曆三十二年進士授雒南知縣調長
安四十年擢御史極陳京營虛耗人才摧折公私匱乏東方
羣盜數事且曰今東宮所習見者陛下二十年以後罷朝輟
講深居決事之狀也二十年以前早朝晏罷勵精圖治之狀
不得而見也陛下逸宜令東宮知勞陛下安宜令東宮知危
陛下盈成撫運福履非常宜令東宮知憂知懼安可日與宦
官宮妾處而不一見士大夫乎自陛下靜攝以來說者謂權

無旁落然頃者愛女被躡於宮奴館甥受撻於市朝而叩閣不聞上書不達壅蔽極矣疏奏不省時壽寧主壻冉興讓爲掌家宮人梁盈女內官彭進朝等毆辱公主三奏不達興讓掛冠長安門去廷臣方爭其事故鶴言及之先是考選者積三年不得命及命下兩京言路驟增七十八人鶴慮其排擊大臣再尋朋黨疏言向來東西南北之黨寔風馬牛不相及之人願勿續已燼餘灰樹目前新幟臣誠不忍黨人之禍與國終始時躓其言熊廷弼被議鶴疏理之尋出督兩浙鹽法巡按貴州四川烏撒近貴州去川南叙州千里土官恣甚大吏不能制知府安雲龍卒其族人與需益安効良爭印搆兵三十年後竟爲効良所據其父紹慶又據需益州皆川雲貴

咽喉地鶴請割烏撒隸貴州便節制可弭後患議不決而止後効良爲亂如其言貴州土官以百數水西安氏最大而土地戶口貢賦之屬無籍可稽鶴乃檄宣慰安位盡著之籍并首領目把主名承襲源委悉列上有司自是簿牒始明奸弊易核事竣不候命徑歸久之還朝楊鎬四路師敗鶴薦熊廷弼張鶴鳴李長庚薛國用袁應泰因乞停皇稅釋纍臣登遺逸納諫諍發內帑收人心不報又言遼事之失不料彼已喪師辱國誤在經畧不諳機宜馬上催戰誤在輔臣調度不聞束手無策誤在樞部若至尊優柔不斷是又至尊自誤并言李如楨不可鎮遼京城士民移家潛避者宜重罪亦不報當事惡其直將假他事逐之乃引疾去旋丁外艱天啓初起太

僕少卿擢右僉都御史巡撫南贛未任丁內艱初廷弼宣慰
遼東鶴實薦之及魏忠賢擅政御史卓邁劾鶴黨護廷弼遂
除名崇禎元年召拜左僉都御史帝銳意求治頗事操切鶴
上言陛下圖治甚殷用人若渴平臺召對言路大開誠千古
一時也然其要在培元氣自大兵大役加派頻仍公私交罄
而小民之元氣傷自遼左黔蜀喪師失律暴骨成丘而封疆
之元氣傷日晉紳構黨彼此相傾逆奄乘之誅鋤善類而士
大夫之元氣傷勢如重病初起百脉未調風邪易入亟當培
養而陛下事事勵精臨軒面質或問之而未必盡知事下六
曹或呼之而未必立應致干聖怒數取譴訶竊以爲過矣今
一切民生國計吏治邊防宜取祖宗成法委任責成嚴爲之

程寬爲之地圖之以漸鎮之以靜何慮不臻太平哉報聞尋
進左副都御史明年拜兵部右侍郎代武之望總督陝西三
邊軍務當是時關中頻歲大荒有司不能恤羣賊蜂起鶴未
至白水王二漢南王大梁隋州叛卒周大旺皆已誅滅而繼
起者益衆邊軍饑困者應之延安榆林間大抵皆賊故事總
督大臣率用邊撫知兵者鶴素不膺軍旅之任廟堂誤用之
莫知爲計其冬京師被兵延綏寧夏甘肅固原臨洮五鎮總
兵官悉以勤王行賊益無所畏延綏兵中道逃歸爲賊巡撫
張夢鯨憂憤死移書囑鶴糾之鶴不以聞甘肅兵亦譁懼誅
合於賊賊益張三年正月王左掛等攻宜川爲知縣成材所
却轉攻韓城鶴及陝西巡撫劉廣生命參政洪承疇援之會

他援兵亦至俘斬三百餘人始解圍北走清澗鶴以軍中無帥連疏請諸將還鎮乃起故將杜文煥任之時延安知府張輦都司艾穆蹙賊於延川賊王子順張述聖姬三兒等乞降別賊王嘉肩等掠延安慶陽城堡多陷鶴廣生主撫匿不奏所撫王虎小紅狼一丈青掠地虎混江龍等並給免死牌安州賊攻陷金鎖關殺都司王廉調榆林僉事張福臻討之是時歲益侵饑益缺軍民日相挺爲亂雖時有克捷而其勢不衰鶴屢疏請蠲請賑且請益餉大征朝議方急遼左不能應而鶴又素無方畧以故一意主撫嘉肩陷黃甫清水木瓜三堡遂陷府谷縣已撫王左掛以白汝學綏德州謀內應事覺

巡按李應期與承疇文煥計命遊擊左光先守備白邦正就綏德誅之左掛等五十七人皆死已而神一元陷寧塞明年陷保安一元死弟一魁圍慶陽陷合水鶴聞移駐寧州一魁求撫送還合水知縣蔣應昌別賊拓先齡金翅鵬過天星田近菴獨頭虎上天龍等亦先後降鶴設御座於城樓賊跪拜呼萬歲因宣聖諭令設誓或歸伍或歸農賊佯許之立赦其罪鶴以一魁最強致其塔帳中與同臥起一魁果至數以十罪稽首謝卽宣詔赦之畀以官處其衆四千餘人於寧塞使守備吳弘器護焉鶴報功乞錄弘器及都司費邑宰帝俞之賊黨茹成名最桀驁鶴令一魁所善劉金誘戮之其黨懼挾一魁復叛而別賊李老柴獨行狼田近菴又攻陷中部御史

謝三賓言鶴謂慶陽撫局旣畢賊散遣俱盡中部之賊寧自天降疏下巡按御史吳牲覈奏牲亦劾鶴主撫悞國帝怒遣使逮下獄戍袁州八年冬卒於戍所子嗣昌時爲宣大總督請恤帝念嗣昌勞復其官鶴初以尤世祿寧夏大捷功進兵部尚書太子少保世廕錦衣千戶迨十年叙賀虎臣寧夏破賊功追加太子少傅十三年又以甘肅叙功任一子官鶴居官無大過用違其才遂致顛蹶論者惜之從弟鸚崇禎四年進士官御史有才名擢順天巡撫京師陷南歸福王以爲兵部右侍郎總督川湖軍務

嗣昌字文弱萬曆三十八年進士改除杭州府教授遷南京國子監博士累進戶部郎中天啓二年引疾歸崇禎元年起河南副使明年京師戒嚴以巡撫范景文檄募兵入衛優詔嘉獎尋加右參政移霸州四年移山海關飭兵備大凌城被大清兵圍樞輔孫承宗巡關御史王道直總兵官宋瑋俱赴援嗣昌獨鎮關門甚著勞績父鶴被逮三疏請代罪得減死五年四月擢右僉都御史巡撫永平山海諸處嗣昌父子初不附逆奄於東林本無嫌遷安故侍郎郭鞏謫戍廣西其鄉人有爲訟冤者嗣昌以鞏已部民以聞於朝遂爲給事中姚思孝所駁鞏故麗名逆案而思孝附東林者也自是與東林忤七年秋拜兵部右侍郎兼左僉都御史總督宣大山西軍務嗣昌言臣父昔官總督罪戍袁州已及三年臣復何心敢居此職帝優詔答之而不赦鶴也時中原饑羣盜蜂起嗣昌

請開金銀銅錫礦以解散其黨廷議不允已上六疏陳邊事多所規畫帝異其才尋以父憂去復遭繼母喪九年秋兵部尚書張鳳翼卒帝顧廷臣無可任者特起復嗣昌屢疏力辭不許明年三月抵京請召對嗣昌通籍後積歲林居博涉文籍多識先朝故事工筆札有口才酬對敏捷帝與語甚悅大信愛之鳳翼故柔靡兵事無所區畫嗣昌銳意振刷帝益以爲能每對必移時所奏請無不聽曰恨用卿晚嗣昌乃議大舉平賊請以陝西河南湖廣江北爲四正四巡撫分防而專防以延綏山西山東江南江西四川爲六隅六巡撫分防而協勦是謂十面之網而總督總理二臣隨賊所向專力征討福建巡撫熊文燦者討海賊有功好大言自詭足辦賊嗣昌

聞而善之會總督洪承疇王家禎分駐陝西河南而家禎故庸才不足任嗣昌乃薦文燦代之令駐鄖陽因議增兵十二萬增餉二百八十萬其措餉之策有四一曰因糧一曰溢地一曰事例一曰驛傳因糧者因舊額之糧量爲加派前總理盧象昇初議未行放其意畝輸糧六合石折銀八錢傷殘地不與歲得銀百九十二萬九千有奇溢地者民間土田溢原額外者核實輸賦歲得銀四十萬六千有奇事例者富民輸資爲監生一歲而止驛傳者前此郵驛裁省之銀以二十萬充餉戶部尚書程國祥不敢違議上帝乃傳諭流寇延蔓生民塗炭不集兵無以平寇不增賦無以餉兵勉從廷議暫累吾民一年除此腹心大患其改因糧爲均輸布告天下使知

爲民去害之意嗣昌尋議令諸州縣練壯丁以捍本土詔撫按飭行賊攻浙川左良玉不救致城陷山西總兵王忠援河
南稱疾不進兵譟而歸帝臨朝太息嗣昌進曰尤世威張全
昌俱失事候勘而全昌降賊不死罪尤重請逮戮以肅軍令
帝然之因并逮忠良玉以六安功落職戴罪自贖嗣昌乃薦
宣大總督盧象昇宣府巡撫陳新甲知兵請令久任而戒飭
薊遼總督吳阿衡薊鎮巡撫陳祖苞總兵陳國威毋耽宴樂
廢邊備後三人失事如嗣昌言初嗣昌建四正六隅之說帝
深喜之中外亦冀其成功雖加賦人不敢議其後以江北急
改駐總理於安慶而鄖撫復留已牴牾前策及文燦受事卽
議撫嗣昌顧不以爲異議陰主之而復上疏申已說言網張

十面必以河南陝西爲殺賊之地然陝有李自成惠登相等
大部未能勦絕法當驅關東賊不使合而使陝撫斷商雒鄖
撫斷鄖襄安撫斷英六鳳撫斷毫潁而應撫之軍出靈陝保
撫之軍渡延津然後總理提邊兵監臣提禁旅豫撫提陳永
福諸軍并力合勦勢期必盡若關中大賊透出關東則秦督
提曹變蛟等出關協擊礪三月之軍鋒除十年之劇寇苟巡
撫不用命立解其兵柄簡一監司代之總兵不用命立奪其
帥印簡一副將代之其監司副將以下悉以尚方劍從事則
人人効力何賊不平遂尅今年十二月至明年二月爲滅賊
之期又請身赴行間督戰帝並可其奏而不許其行嗣昌復
以開礦散賊爲言朝議迂之終不用是時賊大入四川朝士

尤洪承疇縱賊嗣昌因言於帝曰熊文燦在事甫三日承疇七年不効論者繩文燦急而承疇縱寇莫爲言近惟孫傳庭疏摘其釁惟聖明裁察嗣昌意帝譴承疇則文燦新受任可無罪乃帝以承疇積勞而文燦嗣昌所薦知有意左右之變色曰督理二臣但責成及時平賊奈何以久近藉之口嗣昌乃不敢言十一年正月以督撫多不得才請詔大臣言官舉堪任者毋拘資格及罪廢又請勅督撫評將帥年力勇怯以聽去留帝皆從之帝初納廷臣言課天下守令以修城郭練民兵儲糗糧備甲仗四事定功罪行數載徒空文帝復諭嗣昌嚴責撫按官嗣昌勒成一編以上帝賜名欽定保民四事書頒天下然有司卒不能力行也嗣昌建合勦之策謂賊必

可平專任文燦文燦則專主撫所加餉天子特遣一侍郎督之本藉爲勦賊用文燦悉以資撫嗣昌竟不守前說而帝不復詰廷臣亦無言及之者至三月嗣昌以滅賊踰期疏引罪薦侍郎張福臻李若星吳甡及職方郎趙光抃自代帝不許而命察行間功罪乃上奏曰洪承疇專辦秦賊賊往來秦蜀自如勦撫俱無功不免於罪熊文燦兼辦江北河南湖廣賊撫劉國能張獻忠戰舞陽光山勦撫俱有功應免罪諸巡撫河南常道立湖廣余應桂有功陝西孫傳庭山西宋賢山東顏繼祖保定張其平江南張國維江西解學龍浙江喻思恂有勞鄖陽戴東旻無功過鳳陽朱大典安慶史可法宜策勵圖功總兵則河南左良玉有功陝西曹變蛟左光先無功山

西虎大威山東倪寵江北牟文綬保定錢中選有勞無功河南張任學寧夏祖大弼無功過承疇宜遣代因軍民愛戴請削官保尚書俾以侍郎行事變蛟光先貶五秩與大弼期五月平賊踰期并承疇逮治大典貶三秩可法戴罪自贖議上帝悉從之嗣昌終以文燦爲賢而文燦寔不知兵旣降國能獻忠謂撫必可恃嗣昌亦遂聽之所請無不曲徇不復言十面張網之策矣是月帝御經筵畢嗣昌奏對有善戰服上刑語帝怫然詰之曰今天下一統非戰國兵爭時比小醜跳梁不能伸大司馬九伐之法奈何爲是言嗣昌慚頓首謝罪當是時流賊旣大熾而朝廷又時時切東顧憂適太陰掩熒惑帝減膳修省嗣昌歷引漢永平唐元和宋太平興國事以爲不足憂其意實陰爲互市地給事中何楷疏駁之嗣昌奏辨帝不問楷同官錢增復上言嗣昌蒞任初慷慨肩事章數十上輒荷溫綸若不難立奏廓清者臣實壯之迨十面之埋伏空布六月之師期漸踰十二萬甲兵同於畫餅二百八十萬軍餉委之逝波師老財殫岌岌乎有潰敗之勢臣竊憂之至議開市一疏援引不倫所述漢唐宋諸事聞者咸爲髮指嗣昌乃再疏請罪優詔慰留南京御史林蘭友復疏論帝怒斥之外六月特命改禮部尚書兼東閣大學士入參機務仍掌兵部事再疏辭不許乃入直初嗣昌之奪情也廷臣以古者金革無避未敢訟言其非及入政府又奪陳新甲情起爲總督於是何楷首論之少詹事黃道周詆尤力帝不悅特御平

臺詰問道周會修撰劉同升編修趙士春疏復入帝怒并議道周罪俱鐫三級留翰林嗣昌嗾刑部主事張若麒醜詆道周遂鐫六級出之外同升士春亦皆謫外已而南京御史成勇兵部尚書范景文等言之亦獲譴嗣昌自是不理於人口文燦撫獻忠朝野知必叛言者紛至嗣昌執益堅至是始持兩端言科臣姚思孝以職掌過臣始聞外議欲易文燦至豫撫常道立尤諸臣急欲易者臣不敢偏袒伏候聖裁帝嚴責文燦滅賊卒不易也時我

大清兵自牆子嶺入總督吳阿衡敗死阿衡者裕州人爲河東副使鑿冰扼流賊西渡有知兵名累官兵部右侍郎代張福臻總督薊遼保定軍務節制寧遠方一藻山海馬任順天陳祖苞三巡撫性嗜酒與總兵官吳國俊賀監視中官鄧希詔生辰大醉不能軍而警猝至乃據牆子路城拒五日力屈城破與中軍副將魯宗文俱死福王時得諡忠毅阿衡旣死京城戒嚴總理盧象昇帥師入衛嗣昌與議不合惡之編修楊廷麟因劾嗣昌誤國嗣昌怒卽改廷麟職方主事監象昇軍帝命中官高起潛監督軍務嗣昌與之比意主和議以紓外難戒諸將持重毋輕戰而

大清兵所至立破諸將益彼此觀望州縣失亡相繼嗣昌莫知所爲十一月稱疾乞假命稍痊卽起視事俄請輿疾督戰及首輔劉宇亮出視師復請代行並優詔不許御史王聚奎劾嗣昌機事不審予智自雄用一太阿倒授之文燦而賊勢

日張用一大言不慚之阿衡而邊關不戒出處俱失忠孝兩虧無涓埃之補貽丘山之禍帝不納而嗣昌內慚十二月象昇陣亡嗣昌益憂懼請賜鈇鉞昭國法有詔貶三秩戴罪視事十二年正月

大清兵克濟南德王被執遊騎直抵兗州御史郭景昌上言自嗣昌倡樂天事小之說致邊備日弛上下欺蔽庇一文燦禍延諸方庇一道立毒流中土且剛愎自用陰鷲恣行筆端閃爍工於飾非直孔子所謂利口覆邦家者宗社安危視此一人莫謂臣言不蚤也亦不納及濟南變聞嗣昌復請罪聚奎因劾嗣昌及山東巡撫顏繼祖請立正大法謝祖宗在天之靈洩中外臣民之憤報聞嗣昌以人言再至力求避位帝

仍慰留且戒言官挾私妄奏而言者猶不已給事中張作楫歷詆諸臣中有提兵十萬計專避銳語時實無提十萬兵者責令首實因言嗣昌條奏機宜不曰避銳則曰毋浪戰阻將士之心開觀望之弊此國法之當正者高起潛手握重兵羽書告急左次不救反行剽掠致士民輿謠怨聲載道臣有所聞敢不入告帝以無指實責令再陳作楫復言嗣昌謂臣調關寧勁兵至必建奇勲及援師雲集反以毋浪戰爲戒起潛禁近親臣果戮力行間救民水火民將歡迎不暇乃所至閉關拒擊豈非兵不救民反掠民耶帝終以爲誣詆貶斥之二月

大清兵北旋給事中李希沆言聖明御極以來北兵三至已

已之罪未正致有丙子丙子之罪未正致有今日語復侵嗣昌御史王志舉亦劾嗣昌悞國四大罪請用丁汝夔袁崇煥故事帝怒希沆貶秩志舉奪官初帝用嗣昌非廷臣意知其必有言故言者輒斥嗣昌既負重罪帝又數逐言官中外益不服及字亮以督察無功奪職而嗣昌居位自如人言益籍籍嗣昌亦不自安屢疏引罪乃落職冠帶視事未幾以叙功復之方事之殷也嗣昌但據軍中報具奏請旨或一日數上事皆從已決比旨下軍前則機宜已變欲遵部議則事勢非不遵罪且及以故進止乖宜事機屢失然諸將實懼怯不敢戰又藉口持重逗遛退縮致疆事大壞亦不盡嗣昌罪也先是京師被兵樞臣皆坐罪二年冬尚書王洽下獄死復論大

辟九年秋尚書張鳳翼出督師服毒死猶削其籍及是亡七十餘城罪更浮洽等嗣昌自危而帝眷不替怒山東巡按郭景昌有言至逮繫遣戍嗣昌以中樞責重薦四川巡撫傅宗龍自代帝從之仍令候代議文武諸臣失事罪嗣昌乃分五案曰守邊失機曰殘破城邑曰失陷藩封曰失亡主帥曰縱敵出塞於是中官則薊鎮總監鄧希詔分監孫茂霖巡撫則順天陳祖苞保定張其平山東顏繼祖總兵則薊鎮吳國俊陳國威山東倪寵援勦祖寬李重鎮及他副將以下至州縣有司凡三十六人同日棄市而嗣昌貶削不及以是物議益叢當未解嚴時廷臣多請練邊兵嗣昌因定議宣府大同山西三鎮兵十七萬八千八百有奇三總兵各練一萬總督練

三萬以二萬駐懷來一萬駐陽和東西策應餘授鎮監巡撫
以下分練延綏寧夏甘肅固原臨洮五鎮兵十五萬五千七
百有奇五總兵各練一萬總督練三萬以二萬駐固原一萬
駐延安東西策應餘授巡撫副將以下分練遼東薊鎮兵二
十四萬有奇五總兵各練一萬總督練五萬外自錦州內抵
居庸東西策應餘授鎮監巡撫以下分練汰通州昌平督治
二侍郎設保定一總督合畿輔山東河北兵得十五萬七千
有奇四總兵各練二萬總督練三萬北自昌平南抵河北聞
警策應餘授巡撫以下分練又以畿輔重地議增監司四人
於是大名廣平順德增一人真定保定河間各一人薊遼總
督下增監軍三人議上帝悉從之然嗣昌所議兵數至七十

餘萬爲名美而已民流餉缺卒未嘗有實也帝又採副將楊
德政議府汰通判設練備秩次守備州汰判官縣汰主簿設
練總秩次把總並受轄於正官專練民兵府千州七百縣五
百捍鄉土不他調嗣昌以勢有緩急請先行畿輔山東河南
山西從之於是有練餉之議初嗣昌增勦餉期一年卽止後
餉盡而賊未平詔徵其半至是督餉侍郎張伯鯨復請全徵
帝慮失信大學士薛國觀程國祥以爲可行嗣昌復言加賦
出於土田土田盡歸有力家百畝增銀三四錢稍抑兼并耳
貧者何害帝意遂決戶部尚書李待問不敢違由是勦餉之
外復增練餉七百三十萬海內益怨嗣昌不顧時論者謂九
邊自有額餉槩予新餉則舊餉安歸邊兵多虛額今指爲實

數餉益虛糜而練數仍不足且兵以分防不能常聚故有抽練之議抽練而其餘遂不問且練仍虛文邊防愈益弱至州縣民兵益無寔徒糜厚餉以嗣昌主之且事鉅莫敢難也神宗末增賦五百二十萬崇禎初再增百四十萬總名遼餉至是復增勦餉練餉額更溢之先後增賦一千六百七十萬民不聊生益起爲盜迨帝末年深悔前失用大學士蔣德璟言詔罷練餉而賊兵已逼城下矣熊文燦之撫賊也自謂劇賊已盡奏詞自詡嗣昌亦謂大功垂成傅宗龍且至得卸兵政至六月而張獻忠變聞嗣昌頗憂懼上疏請斥不許八月宗龍抵京嗣昌遂解部事專治閣務嗣昌猶欲倚文燦收後効及羅漢山敗書聞帝漸悟嗣昌不足倚旣撓羣議用之庶幾

一出平賊謝天下遂於嗣昌解任引罪疏特旨令督師嗣昌再疏辭不允命爲督師輔臣賜尚方劍統制諸方兵馬總督以下並聽節制副將以下先斬後聞九月朔召見於平臺慰勞備至命吏部用人戶部措餉兵部調度俱內外協應嗣昌曰臣聞君言不宿於家臣朝受命夕當啓行顧軍資甲仗未備望勅所司專發帝悅曰卿能如此朕更何憂駕還宮漏下二鼓矣翊日賜白金百大紅紵絲四表裏四斗牛衣一賞功銀四萬銀牌千五百幣帛千嗣昌條七事以獻悉報可初四日復召見帝密有所諭左右莫得聞出御製贈行詩一章嗣昌跪誦拜且泣命賜宴越二日陞辭復賜膳以二十九日抵襄陽入文燦軍頗尤之文燦訴勦餉不至者六十萬而新附

馬進忠李萬慶等不從亂均州五營雖亡去多思自拔者冀以此解免嗣昌乃爲文燦辨曰廷臣以文燦不能勦賊誣其無才不能用兵誣其無算文燦特過持重耳且流寇數十百萬不可勝誅必撫勦兼施方可解散文燦收拾兩年功已十成六七獨獻忠再叛八營動搖今以一青廢置并所用之人訾之非公論蓋文燦之罷由河南巡按高名衡劾之及嗣昌檄召知府萬年策僉事孔貞會効用軍前名衡又劾二人以撫愚文燦不可用嗣昌以此發憤且曲庇文燦而帝卒重罪之不用嗣昌議也嗣昌旣受代以十月朔大誓三軍督理中官劉元斌湖廣巡撫方孔照總兵官左良玉陳洪範等畢會以良玉有將才請拜爲平賊將軍報可是月賊賀一龍等掠

葉圍沈丘焚項城之郛寇光山副將張琮刁明忠率京軍踰山五十里及其巢射殺緋袍賊二人斬首千七百有奇嗣昌稱詔頒賜十一月王國寧復以衆千人來歸國寧自號興世王與惠登相等同叛至是願從良玉自効嗣昌受之於襄陽處其妻子樊城良玉旣佩將軍印志凌驕遣使以書誡嗣昌不悅會賀人龍大破賊興安嗣昌請進秩賜獎欲漸貴之以抗良玉良玉知之甚愠初獻忠及羅汝才惠登相等八營遁耶陽興安山間聞嗣昌以宰相督師且大軍並集頗懼雖時掠南漳穀城房竹山竹谿勢未甚熾諸將推鋒急擊宜可滅而嗣昌初至卽有養銳之說諸將遂無鬪志且積驕玩嗣昌令刁明忠自承天赴荆門乃自隨棗至襄陽嗣昌將戮之諸

將力救僅撈百而已監軍僉事殷大白兩違軍令請於朝斬之其下始畏然嗣昌雖數遣將但遙相遇未嘗督令合擊且去賊近而偵探時不實朝士皆憂之傅宗龍尅十二月平賊又數趣分道進兵嗣昌不聽遷延至歲暮未一戰張琮賀人龍之捷本非嗣昌功嘗檄巡撫方孔炤遣楊世恩羅安邦勦羅汝才惠登相全軍覆於黃連坪至十三年正月他將戰黃麻又敗嗣昌劾孔炤且自劾孔炤被逮嗣昌亦戴罪汝才雖敗世恩安邦兵聞獻忠困興安懼討與其黨整十萬黑雲祥混世王武自強小秦王白貴關索王承恩遣使乞撫嗣昌方注力獻忠佯許之時李自成潛伏陝右賀一龍左金王等四營跳梁漢東勢差緩嗣昌乃專勦獻忠獻忠先屢敗於興安遣使求撫不許其黨托天王常國安金翅鵬劉希原來降國安卽隨良玉進勦獻忠乃走入川良玉追之嗣昌牒令還良玉不可獻忠自大竹走太平據瑪瑙山自固二月七日良玉與陝西副將賀人龍李國奇夾擊大破之斬馘三千五百有奇墜崖谷死者無算其黨掃地王曹威等授首十反王楊友賢率衆降是月也帝以嗣昌勞苦兵間發萬金犒師賜斗牛衣一良馬金鞍各二使者甫出國門瑪瑙山捷音至帝大悅先免嗣昌戴罪再發銀五萬兩幣帛千端犒師尋論功加太子少保自是軍聲始振而湖廣將張應元汪之鳳敗賊水石壩獲其軍師四川將張令方國安又敗之干江河李國奇賀人龍等連敗之寒溪寺鹽井川陝湖廣諸將畢集復連敗之

黃墩木瓜溪軍聲益振汝才登相之求撫也使再至後爲獻忠所搖計未決及聞瑪瑙之敗二賊斂兵南漳遠安間尋殺安撫官姚宗中走大寧大昌犯巫山爲川中患而獻忠遁興安平利山中良玉圍而不攻賊得收召散亡由興安房縣走白羊山而西與汝才等合嗣昌以羣賊合其勢復張乃由襄陽赴彝夜扼其要害四月帝念嗣昌復賜勅曰卿自去秋辭闕半載有餘行間勞苦鬚髮盡白無時不軫朕懷今再發賞功銀萬兩賜鞍馬二其早奏膚功慰朕顛望嗣昌遂請罷鄖陽撫治王鰲永用袁繼成代之又請廢將猛如虎軍前立功並報可是月黃得功朱紀大破賊商城賊魁賀一龍等五大部乞降監督中官盧九德受之未幾颺去汝才登相以是夏

陷開縣連爲諸將鄭嘉棟賀人龍所破汝才偕小秦王東奔登相獨越開縣而西自是二賊始分當是時諸部土馬居山谷罹炎暑瘴毒物故十二三京兵之在荆門雲南兵之在簡坪湖廣兵之在馬蝗坡者久屯思歸多夜亡關河大旱人相食土寇蜂起陝西則竇開遠河南則李際遇爲之魁飢民多從之所在告警嗣昌以聞且請罪帝爲發帑金五萬俾營醫藥責其督諸將進兵而陝之長武川之新寧大竹湖廣之羅田又相繼報陷嗣昌顧兵力不足乃下招撫令爲諭帖萬紙散之賊中於是王光恩說其八營來降嗣昌猶豫不決復叛去七月監軍孔貞會等大破汝才豐邑坪其黨混世王小秦王率其下降賊魁整十萬及登相光恩亦相繼降嗣昌見湖

廣賊少決計入川以八月泛舟上謂川地阨塞諸軍合而蹙之可盡殄會諸將張應元等敗績於土地嶺獻忠勢復張汝才因登相等降力漸弱走合於獻忠及聞督師西二賊急趨大昌犯觀音巖守將邵仲光不能禦遂連破諸守兵十月初大昌陷嗣昌立斬仲光劾逮四川巡撫邵捷春賊遂渡河至通江嗣昌亦至萬縣賊攻巴州不下嗣昌至梁山檄諸將分擊賊已陷劍州趨保寧將由劍道入漢中賀人龍趙光遠拒之賊乃轉掠陷梓潼昭化抵綿州將趨成都十一月嗣昌至重慶賊攻羅江不克走綿竹嗣昌至順慶諸將不會師賊轉掠至漢州去中江百里守將方國安避之去賊遂縱掠什邡綿竹安縣德陽金堂間所至空城而遁全蜀大震賊遂由水

道下簡州資陽嗣昌至果州徵諸將合擊皆退縮屢徵良玉兵又不至賊遂陷榮昌永川十二月陷瀘州自賊再入川諸將無一邀擊者嗣昌雖屢檄令不行其在重慶也下令赦汝才罪降則授官惟獻忠不赦擒斬者資萬金爵侯翊日自堂皇至庖福遍題有斬督師獻忠者資白金三錢嗣昌駭愕疑左右皆賊勒三日進兵會雨雪道斷復戒期三檄賀人龍不奉令嗣昌雖有才然好自用躬親簿書過於繁碎軍行必自裁進止千里待報嘗失機會王鰲永嘗諫之不納及鰲永罷官上書於朝曰嗣昌用師一年蕩平未奏此非謀慮之不長正緣操心之太苦也天下事總挈大綱則易獨周萬目甚難况賊情瞬息更變今舉數千里征伐機宜盡出嗣昌一人文牒

往返動踰旬月坐失事機無怪乎經年之不戰也其間能自
出奇者惟瑪瑙山一役若必遵督輔號令良玉當退守興安
無此捷矣臣以爲陛下之任嗣昌不必令其與諸將同功罪
但責其提衡諸將之功罪嗣昌之馭諸將不必人人授以機
宜但覈其機宜之當否則嗣昌心有餘閒自能決奇制勝何
至久延歲月老師糜餉爲哉帝令中樞申飭嗣昌亦不能從
也先是嗣昌以諸將進止不一納幕下評事萬元吉言用猛
如虎爲總統張應元副之比賊入瀘州如虎及賀人龍趙光
遠軍至賊復渡南溪越成都走漢州德陽綿州劍州昭化至
廣元又走巴州達州諸軍疲極惟如虎軍躡其後十四年正
月嗣昌知賊必出川統舟師下雲陽檄諸軍陸行追賊人龍
軍已大譟西歸所恃止如虎比與賊戰黃陵城大敗將士死
亡過半如虎突圍免賊遂下夔門抵興山攻當陽犯荆門嗣
昌至夷陵檄良玉兵不應賊所至燒驛舍殺塘卒東西消息
中斷鄖陽撫治袁繼咸聞賊至當陽急謀發兵獻忠令汝才
與相持而自以輕騎一日夜馳三百里以二月十一日抵襄
陽近郊用二十八騎誘啓城門夜半從中起放機橋納大衆
城遂陷襄王被執獻忠坐王堂下予之酒曰吾欲斷楊嗣昌
頭嗣昌在遠今借王頭俾嗣昌以陷藩伏法王努力盡此酒
遂害之未幾渡漢水走河南與賀一龍左金王諸賊合嗣昌
初蒞襄陽以其地爲重鎮城外鑿三濠設機橋列橫桓慎啓
閉每門置一副將文移出入譏訶驗問法甚嚴賊乃出不意

破之嗣昌在夷陵驚悸上疏請死下至荊州之沙市謀再舉俄聞洛陽已於正月被陷福王遇害益憂懼遂不食以三月朔日卒年五十四廷臣聞襄陽之變交章論列而嗣昌已死矣繼咸及河南巡按高名衡以自裁聞其子則以病卒報莫能明也帝甚傷悼之命丁啓睿代爲督師而傳諭廷臣云輔臣二載辛勞一朝畢命然功不償過罪寔難辭五府九卿言官議罪以聞定國公徐允楨等請用失陷城寨律斬已死存案或仁施法外或罪宜更加統候聖鑒帝責其游移令再議廷臣議如初帝曰嗣昌功雖未成盡瘁可憫其賜祭有司護柩還籍嗣昌先以勦賊功進太子少傅既死論臨藍平盜功進太子太傅廷臣猶追論不已帝終念之後獻忠陷武陵發其七世祖墓焚嗣昌夫婦柩其子孫獲半體改葬焉

丁啓睿永城人萬曆四十七年進士崇禎時歷山東右參政坐事謫陝西副使九年寧夏兵變殺巡撫王楫啓睿捕誅首惡撫定之再遷右布政使分守關南從巡撫孫傳庭討賊數有功十一年冬就拜右僉都御史代傳庭巡撫傳庭屢破李自成賊衆亡畧盡而關中頻歲旱啓睿連告災不應長武環白水長安臨潼咸陽盜賊蠡起啓睿悉討滅之十三年擢兵部侍郎兼右僉都御史代鄭崇儉總督陝西三邊軍務明年楊嗣昌死加啓睿兵部尚書改稱督師代嗣昌盡督陝西湖廣河南四川山西及江南北諸軍賜尚方劍總督以下並聽節制啓睿本庸才初爲巡撫帝因嗣昌言用之比當重任憂

懼不知所爲既出關將由承天赴嗣昌軍於荊州湖廣巡按汪承詔言大寇在河南荆襄幸息警無煩大軍盡匿漢津船啓睿至五日不得渡折而向鄧州州人閉門詬過內鄉長吏閉之羅啓睿怒上書言狀帝爲切責承詔而命所過不給餉者以乏典論當是時李自成已陷洛陽圍開封勢大熾啓睿畏之不敢援聞張獻忠在光山固始間勢稍弱乃謀於諸將曰上命我勦豫賊此亦豫賊也遂檄左良玉破獻忠麻城斬首千餘級帝真以啓睿足任而啓睿憚自成終不敢擊河南日告開封急啓睿以獻忠爲辭竟不赴九月傅宗龍敗歿於項城自成陷南陽殺唐王連陷州縣十餘衆益盛復圍開封告急書日數至啓睿不得已督兵赴之避賊入城部下大淫掠賊攻圍日急巡撫高名衡總兵陳永福屢挫賊十六年二月賊始解去啓睿在許州畏賊逼始赴開封離許三十里而城卽破其抵開封啓門入賊乘之幾陷御史劉之勃朱奉鈔郝晉給事中沈迅交章彈劾帝以難其代悉置不問汪喬年復敗歿於襄城啓睿勢益孤復失府州縣十餘不能救良玉又不肯爲用一籌莫展空文塞責而已至六月帝特釋侯恂於獄用爲兵部右侍郎總督援勦諸軍救開封恂軍未至賊圍開封益急啓睿數奉詔切責乃大集良玉虎大威楊德政方國安之軍偕保定總督楊文岳以七月會於朱仙鎮與賊壘相望啓睿欲戰良玉不可啓睿曰圍已急必擊之諸將皆懼請詰朝合戰良玉歸營卽先走諸營俱走啓睿文岳聯騎

黃雲山人集 史藁 敬慎堂

奔汝寧賊追之喪馬羸七千將士數萬啓睿勅印俱失事聞
詔褫職候代至九月開封遂陷乃徵下吏久之釋歸當是時
中原糜爛已極啓睿以匪材膺重任由廟堂不知人而本兵
又一歲數易莫爲計時相周延儒輩悉置疆事膜外一敗塗
地中原陸沉論者恨之福王時啓睿夤緣馬士英充爲事官
督河南勸農勦寇諸務尋以擒斬歸德僞官拜兵部尚書加
太子太保官其一子給事中吳适劾之不聽明年事敗不能
死旋里久之卒從父魁楚崇禎四年春以右僉都御史巡撫
保定副使盧象昇等討流賊有功魁楚亦被賞七年擢兵部
侍郎代傅宗龍總督薊遼保定軍務九年七月

兵入昌平長驅南下魁楚不能禦下吏久之放還福王

明史卷之九 納其重賄起故官總督河南湖廣兼巡撫承天德

此未赴會兩廣總督沈猶龍入爲侍郎魁楚竟代其任

加兵部尚書唐王自立於福州命以故官協理戎政靖江

王亨嘉反桂林下梧州執巡撫瞿式耜魁楚檄思恩參將陳

邦傳等襲走之獲於桂林封魁楚平粵伯仍留鎮兩廣閩中

事敗與式耜擁立桂王於肇慶進東閣大學士兼理戎政

大清兵下廣州漸迫肇慶魁楚奉王走梧州復棄之走岑溪

輜重多舳艫相屬爲大將李成棟追獲魁楚遂降成棟與有

隙錄其家數百人殺之魁楚乞一子成棟笑曰汝身且莫保

尚求活人耶并殺之

嫻將略能治軍六年山西賊流入畿輔據臨城西山距順德
百里象昇擊卻之已復與總兵梁甫參議寇從化連敗賊賊
走還西山游擊董維坤被圍冷水村象昇分兵救而設伏石
城南大敗賊又破之青龍岡象昇每臨陣身先士卒與賊格
鬪刃及鞍弗顧失馬卽步戰嘗逐賊危崖一賊自巔馳射中
象昇額并斃其從人卒力鬪以免已而賊屯武安其地非象
昇所轄馳師擊之斬其魁四人及餘黨甚衆明日復斬其魁
七人前後收還男婦幾二萬是年冬賊渡河殘河南明年破
鄆陽六縣命象昇以右僉都御史撫治鄆陽至則屬邑殘壞
兵缺餉且從賊象昇鎔所服銀盃鞋帶市具權牛犒衆因告
之曰朝廷餉不汝缺特後至耳爾衆敢作賊耶與爾衆約有

懷二心者殺無赦衆感勵誓死不二時蜀寇返楚者駐鄆之
黃龍灘象昇與總督陳奇瑜分道夾擊自烏林關也家溝石
泉壩康寧坪獅子山太平河竹木砭箐口諸處連戰皆捷斬
馘至五千六百有奇漢南寇幾盡因請益鄆主兵減稅賦繕
城郭貸鄰郡倉穀募商採銅鑄錢鄆得完輯八年五月湖廣
巡撫唐暉失事擢象昇右副都御史馳代之時奇瑜已罷洪
承疇以三邊總督兼勦寇事東西奔命朝議擇一人佐之以
象昇威名爲賊所憚其年八月命總理江北河南山東湖廣
四川軍務兼湖廣巡撫承疇辦西北象昇東南未幾解巡撫
任進兵部侍郎加督山西陝西軍務賜尚方劍便宜行事初
象昇在武昌分布諸將要地自率副將楊世恩雷時聲等迎

賊羅山而賊帥整齊王已從信陽走孝感應山象昇復率副將李重鎮陳永福等破走之會汝洛告急乃倍道馳入汝當是時賊帥高迎祥李自成部衆三十餘萬連營百里勢甚盛象昇至督重鎮時聲等擊迎祥於城西連戰二日用強弩射殺賊千餘人迎祥乃合自成走陷光州象昇復大破之確山先是大帥曹文詔艾萬年陣亡尤世威敗衄諸將率畏賊不前象昇每慷慨洒泣激以忠義軍中嘗絕三日餉象昇亦水漿不入口以是得將士心戰輒有功九年正月象昇師次鳳陽諸將來會乃上言曰賊橫而後調兵賊多而後增兵是爲後局兵至而後議餉兵集而後請餉是爲危形況請餉未敷兵將從賊而爲寇是八年來所請之兵皆賊黨所用之餉皆

盜糧也又言總督總理宜有專兵專餉請調咸寧甘肅之兵屬總督薊遼關寧之兵屬總理又言各直省撫臣俱有封疆重任毋得一有賊警卽求援求調不應則吳越也分應之何以支持又言臺諫諸臣不問難易不顧死生專一求全責備雖有長材從何展布臣與督臣有勦法無堵法有戰法無守法其言切中事宜而朝廷不能盡用也越月迎祥圍廬州不能破分道陷含山和州進圍滁州象昇聞警卽率總兵祖寬遊擊羅岱軍馳抵滁城下鏖戰賊大潰追斬無算伏屍蔽野滁水赤流數里賊乃北趨鳳陽圍壽州突穎霍蕭碭靈璧虹窺曹單總兵劉澤清拒河乃掠考城儀封而西其犯亳者折入歸德永寧總兵官祖大樂邀擊之賊乃北向開封陳永福

敗之朱仙鎮賊遂走登封與他賊合分趨裕州南陽象昇合
寬大樂岱兵大戰七頂山殲自成精騎殆盡已次南陽令大
樂備汝寧寬備鄧州而躬率諸軍蹙賊遣使告湖廣巡撫王
夢尹鄖陽撫冶宋祖舜曰賊疲矣東西邀擊前阻漢江可一
戰殲也兩人竟不能禦三月賊自光化潛渡漢入鄖象昇遣
總兵秦翼明副將雷時聲由南漳穀城入山擊賊寬等皆騎
軍不利阻隘副將王進忠軍譚羅岱劉肇基兵多逃逸之則
彎弓內嚮象昇無如何乃調四川及寧子土兵搜捕均州賊
是時楚豫賊及迎祥等俱在秦楚蜀交界萬山之中象昇自
南陽至襄陽欲進兵賊多兵少不能四應而河南大饑無以
供餉邊兵益洶洶象昇奏曰州縣庫藏如洗官兵至有司閉

關乏供億賊行無定向疾追恐不及臺省皆以尾擊責臣不
知有尾追者又有迎截者追乃可及若有追無截賊回馬他
向雖追莫及也總督承疇以關中平曠利用騎兵親出關與
象昇議以寬重鎮軍入陝給事中史可鏡劾象昇高臥汴梁
置全楚於度外下旨切責而襄陽疊告警均宜城穀城上津
南漳環山皆賊七月象昇渡浙河南向九月追賊至鄖西會
大清兵薄京師命總督各鎮兵入衛再賜尚方劍象昇既行
賊遂大逞不可復制矣及至都城已解嚴會宣大總督梁廷
棟卒遷象昇兵部左侍郎總督宣大山山西軍務宣大素苦缺
餉象昇乃大興屯利行二年積穀至二十萬帝諭九邊奉以
爲式十一年三月象昇以生日方舉觴侑客諜報西部乞炭

台吉數萬騎入邊求市象昇卽夜督兵出羊房口尅期決戰乞炭解去踰二月丁外艱廷議奪情留任象昇四疏懇請帝哀之特起陳新甲制中令象昇候代新甲家四川未上乃墨衰從事尋進兵部尚書八月新甲至九月我

大清兵入牆子嶺薊遼總督吳阿衡敗詔象昇勒王三賜尚方劍督山西總兵楊國柱王樸虎大威諸軍入援時楊嗣昌奪情任中樞與總監中官高起潛潛主和議象昇心非之十月四日召對平臺帝慰勞之咨以方略對言命臣督師臣意主戰帝色變良久曰撫乃外廷議耳象昇因奏禦敵形勢甚悉帝壯之而誠象昇持重命與嗣昌起潛等議當是時帝心知

大清兵銳甚力不敵而恥言和故委廷議以荅象昇象昇出與兩人議不合明日帝發萬金犒軍象昇卽日陛辭嗣昌送之屏左右欲有言久而不能出口第丁寧毋輕戰而已諸將素怯聞嗣昌言咸喜象昇則益自奮夜半抵昌平帝復遣中官齎帑金三萬銀牌三千幣五千犒師明日又賜御馬百太僕馬千銀鐵鞭五百象昇念帝意頗銳而事多爲起潛撓憤甚疏請分兵嗣昌定議宜大山西三帥屬象昇關寧諸路屬起潛象昇名督天下兵實不及二萬師次順義抵暮至孫垓忽遇

大清兵象昇從騎止十餘念退則必死拔刀前決鬪會援軍漸集得還越數日嗣昌至軍象昇責以阻師且曰公等堅意

撫欵獨不思城下之盟春秋所恥長安口舌如鋒恐袁崇煥之禍立見嗣昌頰赤曰公直以尚方劍加我矣象昇曰既不奔喪又不能戰不忠不孝尚方劍當先加已頸安得加人嗣昌曰公母以長安蜚語陷人象昇曰周元忠赴敵講欵往來數日其事始蘄鎮督監受成本兵通國共聞誰可諱也嗣昌語塞而去元忠蓋瞽人賣卜者善遼人故遣之然議和事亦不得要領而止又數日會起潛安定門象昇大言非血戰無以盡臣職起潛曰恐野戰非我所長耳兩人各持一議陳新甲亦至昌平象昇分兵與之而自將馬步軍列營京城外兵益寡時

大清兵分三路一由涑水攻易州一由新城攻雄縣一由定興攻安肅象昇聞之從涿州進據保定令諸將分道出擊大戰慶都猶未敗衄而一時列城多望風失守嗣昌乃奏落象昇尚書銜以待郎督師象昇自擢兵備與賊角大小數十戰然賊雖強盛烏合一敗卽散走故所向摧破及是遇大敵又爲嗣昌所扼兵力單餽久乏將士飢甚自知必死晨出帳四面拜曰吾與將士同受國恩患不得死不患不得生衆皆泣莫能仰視遂於十二月十一日進至鉅鹿南賈莊起潛擁關寧兵相距五十里象昇遣贊畫主事楊廷麟往乞援因與訣曰死西市何如死疆場吾以一死報君猶爲薄耳廷麟詣起潛起潛不應象昇卒僅五千行至高水橋與大清兵遇王樸先引兵逃去惟虎大威楊國柱從象昇勒麾

下卒居中，大威師左國柱師右，大戰移時，乃休兵。夜半被圍，明日騎益數萬，至圍三重。象昇麾兵力戰，自辰迄未，砲盡矢窮，大威請潰圍出。象昇不許，猶奮鬪，身中四矢，三刃手格殺數十人，乃死。一軍盡，亡。惟大威國柱得脫，起潛聞，敗遂倉皇遁。嗣昌既夙惡象昇而起，潛懼坐罪，誅諱象昇死狀。嗣昌疑不死，有詔驗視。廷麟遣將得其屍，戰場麻衣猶被體，一卒遙見，卽號泣曰：「此吾盧公也。」肅拜，衆皆奔走。兩泣曰：「盧公死，誰恤我者？」競立祠祀之。順德知府于穎覈其狀，以上事始。白嗣昌故，斬之。踰兩月，乃得殮。明年，象昇妻王氏請恤。又明年，其弟象雲又請帝先中嗣昌言不納。久之，嗣昌敗，廷臣多爲象昇請，乃贈太子少師、兵部尚書，賜祭葬，世廕錦衣。

千戶福王時，追謚忠烈，建祠奉祀。象昇三賜劍，未嘗戮一偏裨。愛才恤下，如恐不及。高平知縣侯弘文者，奇士也，僑寓襄陽。見象昇勞苦，鄖疆散家財募滇軍，隨象昇討賊，題授監紀。已而象昇移任宣大，弘文率募兵至楚，爲王夢尹所陷，以擾驛聞。有旨卽訊象昇，憤上疏曰：「弘文義切封疆，破家募兵，捐軀殺賊，身罹法網，臣甚痛焉。臣初聞弘文譴問，卽遣書責之。其報臣書，絕不及已事，惟以滇兵乏餉爲虞，懷忠報國之氣，百折不磨。今部臣以悞用弘文罪臣，且將故激滇兵之變，以甚弘文罪臣。悞弘文，不悞臣也。弘文卒坐戍天下，痛惜之而嘆象昇能得士也。象昇好畜駿馬，皆有名字，嘗逐賊南漳，賊大至，戰敗，追兵至沙河水澗，數丈一躍而過，卽所畜五

明驥也每自言功成築湄隱園於桃溪以老竟不遂其志死時年三十九耳弟象觀字幼哲舉崇禎十五年鄉試第一明年成進士象觀英略稍視其兄而文采過之後殉國難赴水死方象昇之戰歿賈莊也嗣昌遣邏卒三人察其狀中有俞振龍者歸言象昇實死嗣昌怒箠楚三日夜終不易將斃猶翹首曰天道神明無枉忠臣聞者無不切齒嗣昌云

傅宗龍字仲綸昆明人萬曆三十八年進士除銅梁知縣事至立辦調巴縣行取入都注戶部主事久之授御史天啓元年遼陽破帝下募兵之令宗龍請行一月餘得精卒五千明年安邦彥反圍貴陽土寇蜂起請發帑金濟滇將士而速開建昌通由蜀入滇之路別設偏沅巡撫罷湖廣退怯總兵薛

來滄帝多採納之又上疏自請討賊言爲武定尋甸患者東川土酋祿千鍾爲霑益羅平患者賊婦設科及其黨李賢輩攻圍普安爲滇黔門戶患者龍文治妻及其黨尹二因安南據關索嶺者沙國珍及羅應魁輩困烏撒者安効良臣皆悉其生平非臣敵臣願以四川巡按兼貴州監軍滅此羣醜帝大喜下所司議將從之會宗龍以疾乞歸不果四年正月貴州巡撫王三善爲降賊陳其愚所給敗歿其夏卽家起宗龍而止宗龍至洪學令參政謝存仁參將袁善及土官普名聲沙如玉等以兵五千送之宗龍直渡盤江戰且行寇悉破乃謝遣存仁善以名聲等土兵七百人入貴陽其愚旣陷三善

安居貴陽城爲賊耳目宗龍戮諸市軍民大快宗龍盡知黔中要害及土酋逆順將士勇怯巡撫蔡復一溪信之請勅宗龍專理軍務設中軍旗鼓裨將以下俱聽賞罰可之宗龍乃條上方略又備陳黔中艱苦請大發餉金亦報可初三善令監軍道臣節制諸將致文武不和進退牽制宗龍反其所爲令監軍給芻糧覈功罪不得專進止由是諸將用命連破賊汪家冲蔣義寨直抵織金五年正月總理魯欽敗績於陸廣河宗龍上言不合滇蜀則黔不能平賊不專總督任則不能合滇蜀兵請名還朱燮元以復一兼督四川開府遵義而移蜀撫駐永寧滇撫駐霑益黔撫駐陸廣沅撫駐偏橋四面並進發餉二百萬金給之更設黔蜀巡撫帝以復一斬賊令解

官卽以燮元代而命尹同臯撫蜀王城撫黔沅撫閩夢得移鎮一如宗龍議陸廣敗後諸苗復蠢動復一與宗龍謀討破烏粟螺螭長田諸叛苗大破平越賊毀其砦百七十賊黨漸孤宗龍乃條上屯守策言蜀以屯爲守黔則當以守爲屯蓋安酋土地半在水外狃狃龍伸蔡苗諸雜種緩急與相助賊有外藩我無邊蔽黔兵所以分力愈請臣謂以守爲屯者先發兵據河奪賊所恃然後撫勦諸種隨渡口大小置大小寨溪溝壘置烽墩砲臺小渡則塞以木石使一粟不入水內一賊不出水外則賊無如我何又令沿河兵習水戰當賊耕耨時頻出奇兵渡河擾之則賊不敢附河而居而後我可以議屯也屯之策有二一則清衛所原田一則割逆賊故壤而以

衛所之法行之蓋黔不患無田患無人客兵聚散無常不能久駐莫若倣祖制盡舉屯田以授有功因功大小爲官高下自指揮至總小旗畀以應得田爲世業而禁其私賣買不待招徠戶口自實臣所謂以守爲屯者如此然兵當用四萬八千人餉當歲八十餘萬時當閱三年如此而後賊可盡滅也部議從之會復一已卒代者王城雖至諸事悉倚辦宗龍乃漸剪水外逆黨將大興屯田邦彥懼謀阻之六年三月大舉渡河入寇宗龍擊破邦彥趙官屯斬老蠱添威名大著當是時大帥新亾全黔震動熒元遠在蜀中城徒擁虛位非宗龍黔幾殆先是霑益安効良代邦彥求撫邦彥遣其黨借効良使者入貴陽探虛實宗龍覺而襲之至是兵部以熒元言將

議撫給事中陸文獻因言宗龍殺求撫之人宗龍憤抗疏力辯會貴州薦紳士民連章言不可撫宗龍亦疏爭且乞罷兵部乃令撫勦兼施諸軍遂不進宗龍巡按踰二歲詔加太僕少卿視事如故其冬以丁艱歸崇禎元年冬御史楊通宇薦其文武全才請卽加節鉞逾二年起太僕少卿仍涖御史事用吏部言擢爲卿未幾樞輔孫承宗將告歸舉宗龍自代會薊鎮巡撫劉可訓罷卽擢宗龍右僉都御史代之廷議分順天永平爲二撫命宗龍止撫順天久之監視中官王之心劾其怠職帝以責宗龍宗龍奏辯因乞罷不從尋拜兵部右侍郎兼右僉都御史代曹文衡總督薊遼保定軍務時罷遼東經略并其事於總督責愈重宗龍所統四巡撫寧遠方一藻

永平楊嗣昌順天張鵬雲保定丁魁楚相與協謀武備甚飭初以邊警通州昌平分駐督治兩侍郎復相繼汰去宗龍又請廢通州總兵官自是畿輔要任悉歸總督一人宗龍劾督儲郎中趙秉衡贓私詔逮治秉衡亦劾宗龍不法事宗龍乞罷不允七年七月我

大清兵入大同宣府宗龍卽整兵赴援帝聞之喜賜大紅蟒衣一襲彩幣三白金四十又發內帑五千蟒幣二十雜幣二百犒有功將士八月丁卯命宗龍速援宣府明日又命護昌平諸陵給事中林正亨劾宗龍不赴宣府恒怯觀望帝不問已念其勞苦復犒如前時薊鎮總兵吳襄尤世威亦東援頓兵不進及解嚴兵科給事中常自裕劾二將逗遛當誅而宗

龍乃以全師爲幸宜并罪及宣大總督張宗衡褫職自裕又劾宗龍始勇終怯不罪無以服宗衡心乃下所司論罪削籍歸十年十月流寇大入四川陷三十餘州縣巡撫王維章被逮卽家起宗龍以故官代之至則上擇將屯兵勤訓練肅軍政設防衛數事帝皆褒納賊初入蜀衆皆咎陝督洪承疇旣而賊大挫洮河復將入蜀宗龍與總兵羅尚文禦卻之尚文數有功蜀境漸寧京師被兵宗龍發精騎三千遣兩將入衛十二年五月用楊嗣昌薦召爲兵部尚書八月抵都入對武英殿力言民貧財匱餉不可加兵亦不必益帝初以爲然而宗龍言益切帝怫然曰卿但當整理兵事爾旣退語輔臣曰宗龍所言皆言官唾餘何也自是所奏請多中格時熊文燦

已罷宗龍言向者賊東西無定輔臣嗣昌是以建分勦之策今各止其所臣請收勢險節短之效總理止轄楚豫秦督兼轄四川鳳督兼轄安慶各率所轄撫鎮期十二月成功因薦湖廣巡撫方孔炤堪代文燦帝不用卽用嗣昌帝素憤中樞失職嗣昌用權譎得主知宗龍承其後以伉直失旨會薊遼總督洪承疇請用劉肇基爲團練總兵官宗龍覆議不允帝遂發怒責以抗旨令對狀及宗龍奏上復責以戲視封疆遂下吏法司擬戍邊帝不許欲寘之死十四年春河南襄陽並陷嗣昌卒於軍兵事益亟尚書陳新甲力薦宗龍才五月詔釋爲兵部右侍郎兼右僉都御史代丁啓睿總督陝西三邊軍務啓睿方討張獻忠於蘄黃乃詔宗龍以關中卒專討李

自成宗龍議盡括關中兵餉以出而屬郡洊旱蝗民間徵發已盡乃以秦兵之在河南隸賀人龍李國奇者統之以行保定總督楊文岳以虎大威軍來會九月四日至新蔡令軍中爲浮橋期明日渡河自成亦過河窺汝寧官軍與相值宗龍等宿河口夜召諸將謀邀擊遲明偵報賊過且盡惟一軍殿後官軍至孟家莊方解鞍不爲備賊匿精騎林間日旰出鬪人龍卒先奔國奇戰不敵與大威亦奔宗龍文岳止親軍與賊接文岳營西南宗龍營東夜將半文岳部卒挾其主以逃宗龍慷慨謂其下曰吾當死久矣今日陷賊中當與諸君共死不能效他人走也乃集麾下士六千人卽文岳壁掘塹築壘誓必死而檄國奇人龍援二將不肯救曰書從賊中來庸

知非詐耶自成見宗龍無救穿兩濠困之十一日糧盡殺馬食十五日馬亦盡明日開營突圍遂大潰十九日將至項城宗龍被執賊誑稱秦軍誘守者啓城門宗龍大呼曰此賊也我兵敗被執門不可啓速用砲擊之母以我爲慮賊怒攢刀殺之賊亦退事聞復官兵部尚書加太子少保廕子錦衣世百戶予祭葬楊文岳字斗望南充人萬曆四十七年進士授行人天啓五年擢兵科給事中屢遷禮科都給事中崇禎二年出爲江西右參政歷湖廣廣西按察使雲南山西左右布政使以右副都御史巡撫登萊十二年擢兵部右侍郎總督保定山東河北軍務代孫傳庭十四年正月李自成陷洛陽犯開封詔文岳赴救文岳率總兵虎大威以衆二萬渡河賊已先遁追擊於鳴皋還駐兵開封閏二月疫大作詔促其進兵乃分遣病卒於衛輝諸郡而以餘卒趨汝寧頓兵二月士民苦之遂出屯西平新蔡間已而賊走內鄉浙川與羅汝才張獻忠合文岳趨鄧州賊還攻之文岳戰三捷斬其魁一條龍一隻龍賊遂遁去至八月陝西總督傅宗龍統兵二萬次新蔡文岳以師會之尋大潰於孟家莊再潰於火燒店部將挾文岳夜馳入項城明日奔陳州宗龍遂覆沒事聞命革職充爲事官戴罪自贖文岳稍收亡卒率所部就巡撫高名衡防杞俄賊破葉縣向裕州文岳以十一月四日馳援而賊卽於是日陷南陽唐王遇害方被重劾賊復圍開封明年正月文岳馳解之論功復官文岳慮賊犯汝寧卽與大威及監軍

副使任棟從間道抵上蔡出賊前而命步軍守汝寧等以督師丁啓睿檄移軍郟城啓睿督左良玉與自成汝才大戰文岳亦督大威等助之戰良久賊潰距官軍數里而營文岳啓睿相犄角持十一晝夜賊乃引去六月以開封圍急起侯恂兵部右侍郎總督保定山東河南湖北軍務代文岳而詔所司察文岳罪狀七月朔文岳啓睿合良王大威及楊德政方國安四總兵之師次朱仙鎮良玉先南走國安等繼之啓睿文岳遂聯騎奔汝寧賊渡河追四百里官軍失亡數萬給事中方士亮顧鉉交章論列詔褫官候勘文岳在汝寧夜襲賊營有功賊既陷開封旋敗孫傳庭兵以閏十一月悉衆薄汝寧老回回革裏眼左金王等畢會文岳遣都司康世德偵賊

世德馳還率所部五百人夜縱火噪而走逾二日羣賊悉至離城五里而軍監軍僉事孔貞會以四川兵屯城東文岳以保定兵屯城西賊攻一晝夜川兵潰賊遂攻保定兵僉事王世琮知府傅汝爲通判朱國寶急總將士入城副將賈悌參將馮名聖亦掖文岳貞會登城明日賊四面力攻中矢砲木石賊多死益盡銳攻城遂陷執文岳世琮國寶悌名聖於城上汝爲赴水死文岳見自成汝才大罵世琮國寶等亦不屈賊怒縛之城南三里舖用大砲擊之皆死汝陽知縣文師頤亦死之士民屠戮者數萬人焚公私解舍皆盡貞會執去不知所終崇王由橫先避之襄陽未幾爲賊攻陷亦遇害自成以文岳死忠備禮斂之其後里人易棺改斂顏色如生世琮

字仲發達州人天啓四年舉於鄉崇禎中爲汝寧推官討土寇流矢貫耳不爲動時號王鐵耳以薦超擢汝寧兵備僉事城破被執大罵死汝爲字于宣江陵人崇禎七年進士見城不可保令妻歸養八旬父而已卒死之國寶成都人師頤全州人皆舉人師頤泣任甫三日

汪喬年字歲星遂安人天啓二年進士授刑部主事歷郎中母憂歸崇禎二年起工部遷青州知府廊廡置土銖十餘令訟者自炊候鞠吏無敢索一錢以治行卓異遷登萊兵備副使乞終養歸父喪除起官平陽尋遷陝西右參政提督學校復舉卓異就遷按察使十四年擢右僉都御史巡撫其地時自成已破河南聲言將入關喬年亟率諸將赴商洛不見賊

會三邊總督傅宗龍至欲抽兵括餉關中兵食俱盡喬年無以應也宗龍出關喬年流淚送之已聞張獻忠寇鄖西亟移駐山陽以遏未幾宗龍敗歿於項城詔擢喬年兵部右侍郎總督三邊軍務代之喬年流涕歎曰傅公死討賊無人矣我出如肉餒虎然不可不出以持中原心當是時關中精銳盡沒於項城大將皆跋扈筦樞者又無籌畫喬年收散亾調邊卒僅得三萬人十五年正月率總兵賀人龍鄭嘉棟牛成虎馳出潼關賊方圍左良玉於鄜城甚急而其老砦屯襄城喬年議趨襄城賊必還救良玉乘其背夾擊可大破也乃留步兵火器於洛陽簡精騎萬餘兼程進而襄城已降賊諸生李永祺等率父老迎喬年二月十二日馳入賊卽解良玉圍以

數十萬眾來逆喬年亟勒兵駐城外人龍等三帥未陣而奔軍大潰喬年嘆曰此吾死所也率步卒千餘入城拒守賊為穴發火藥轟城城裂喬年穿阱隨賊所鑿以長矛刺之賊死甚眾五晝夜守具皆盡援不至賊覘喬年燾所在砲擊之雉堞盡碎左右泣請避喬年怒以足蹴其首曰汝畏死我不畏死也守益固十七日城陷巷戰手刃三賊自剄不殊為賊所執大罵賊怒割其舌磔殺之襄城人建祠以祀時副將張國欽黨威李萬慶監紀西安同知孫兆祿材官李可從襄城典史趙鳳牙從喬年皆死自成購永祺不得屠其族剗則諸生百九十人良玉不敢救帝惡人龍甚密諭孫傳庭斬之初喬年撫陝西奉詔發自成先塚謂得其族人為縣吏者掠之去

去縣二百里為李氏村在亂山中十六塚聚葬中一塚自成始祖也相傳穴為仙人所定壙中有鐵燈檠曰鐵燈不滅李氏當興如其言發之有螻蟻數石火光熒熒然斲棺骨青黑色黃毛被體腦後一穴大如錢中盤赤蛇長三四寸有角見日而飛高丈許以口吞日色咋咋者六七反而伏喬年函顱骨并腊蛇以聞自成知而恨甚故致死於喬年云
孫傳庭字伯雅振武衛人自父以上四世舉於鄉傳庭儀表頎碩沈毅多籌略萬曆四十七年成進士授永城知縣以才調商丘天啓初白蓮賊黨居歸德謀應徐鴻儒傳庭弭其變擢吏部驗封主事屢遷稽勲郎中請告歸崇禎時流寇犯其境佐有司捍禦城獲全家居久不出八年秋始起驗封郎中

時四方多難廷臣畏當軍旅任諱言兵傳庭獨談論娓娓當事者羣目為邊才超遷順天府丞明年四月即擢右僉都御史巡撫陝西召見平臺面陳方略帝稱善總督洪承疇用兵六年數奏捷賊勢猶不衰巡撫李喬甘學淵並坐失事喬遣戍學淵罷官傳庭受命慨然以平賊為已任練舊卒三千人為已標兵賊首整齊王據商維諸將不敢攻檄副將羅尚文擊斬之當是時賊亂關中有名字者以十數高迎祥最強拓養坤黨最眾所謂闖王蝎子塊者也迎祥由漢中至盩厔將犯西安傳庭策其飢疲親擊於黑水峪四日三捷生致之闕下餘眾殲殆盡錄功增秩一等拓養坤懼及其黨張耀文來降傳庭署耀文守 後數有功惠登相等敗賀人龍於寶雞

乘勝犯涇陽三原傳庭力戰乃西走河南賊馬進忠劉國忠等十七部入渭南傳庭追之出關復合河南兵夾擊先後斬首千餘級傳庭初入秦即發兵討賊失叵多會進忠等復擾商維而藍田叛卒與合將犯西安關中諸將悉他出左光先曹變蛟西追惠登相聞變急引還甫抵咸陽進忠等由渭南遁官軍追之降其渠一條龍傳庭自劾帝以其有功不問傳庭乃招還脅從募健兒擊餘賊斬聖世王瓦背一翅飛降鎮天王上山虎軍聲復振拓養坤已撫復叛去傳庭遣一騎諭其下即斬養坤首以獻商維遺賊與土寇聯名曰白桿賊傳庭擊斬渠魁數人關南稍靖大天王諸賊犯寶雞副將盛略等再敗之賊走入山谷傳庭方追至鳳翔而他賊出棧道謀

越關犯河南傳庭急迎擊賊走伏斜谷傳庭復敗之降其餘
衆西安四衛舊有屯軍二萬四千田二萬餘頃其後田歸豪
右軍盡虛籍傳庭釐得軍萬一千有奇歲收屯課銀十四萬
五千餘兩米麥萬三千五百餘石帝大喜增秩資銀幣會兵
部尚書楊嗣昌翔四正六隅之說限百日平賊令傳庭專扼
商雒募土著萬人給餉銀二十三萬傳庭謂勦賊須騎兵土
著無益屢移書爭之嗣昌不悅傳庭乃核帑藏蠲贖緩得銀
四萬八千市馬募兵自辦滅賊具不用部議會他撫咸報募
兵及額獨傳庭疏不至嗣昌言軍法獨不行於秦自請白衣
領職以激帝怒遂奉旨詰責傳庭上疏言使臣若他撫籍郡
縣民兵上之遂謂及額則臣先所報屯兵已及額矣况更有

募練馬步軍數且踰萬何嘗不遵部議至百日之期商雒之
信地臣皆不敢妄然使賊入商雒而臣不能禦則治臣罪若
臣扼商雒而踰期不能滅賊誤勦事者必非臣嗣昌無以難
然銜之彌甚傳庭兩奉詔進秩當加部銜嗣昌抑弗奏及十
一年春賊破漢陰石泉坐傳庭失援削其所加秩傳庭方出
扼商雒而大天王等犯慶陽寶雞卽還軍戰合水破走之獲
其二子追擊之延安會過天星混天星等從徽秦趨鳳翔逼
澄城傳庭分兵五道力戰楊家嶺諸所大敗賊賊飢困走竄
傳庭追之大天王知二子不殺遂降傳庭駐中部策鄜州西
合水東三四百里皆荒山遂谷賊入當自斃乃親率標兵東
逼而檄曹變蛟等從慶陽西拒且伏兵三水淳化間賊飢出

掠食傳庭一日夜馳二百五十里至則賊大驚西奔至職田莊遇伏走寶雞復折而走隴州皆遇伏凡三敗賊死者無算過天星混天星並降又討平漢中餘賊且盡降鄠縣一條龍城固搖天動遺黨而是時闖將李自成又爲洪承疇所逐關中羣盜悉平捷聞帝大喜嘉獎備至先敘澄城之捷命加部銜嗣昌仍格不奏陝西賊已平湖廣張獻忠等亦多爲總理熊文燦所撫惟河南賊如故羅汝才馬進忠賀一龍左金王等十三部西窺潼關傳庭計曰天下大寇盡在此矣我出擊其西總理擊其東賊不降則滅此賊平天下無賊矣獻忠卽狙伏無能爲也乃引兵東賊見大軍逡巡引退傳庭追出關連戰闕鄉靈寶山間賊大敗貫其營而東復自東以西賊窘甚以文燦招降手諭上傳庭叱曰降卽解甲來明日再擊士益奮忽得文燦檄謂毋妬吾撫功縱部下戕殺傳庭快快還賊迄不就撫移瞰商雒文燦始悔期傳庭夾擊屬吏王文清等三戰皆敗之賊奔內鄉浙川而去傳庭旣屢建大功其將校數奉旨優敘嗣昌務抑之不爲奏傳庭懇請且上其籍於部嗣昌謂籍未至需之以故將士咸解體十月京師戒嚴召傳庭及承疇入衛俄擢傳庭兵部右侍郎抵真定會總督盧象昇敗歿命兼右僉都御史代督諸鎮援軍賜尚方劍大清兵南下山東十二年正月破濟南傳庭坐失援鐫秩視事旋以故官總督保定山東河南軍務二月大軍北旋傳庭尾至建昌不敢擊初傳庭受命督軍謝疏言

年來疆事決裂由計畫差謬事竣之後當面請決大計嗣昌謂傳庭將傾之傳庭又與總監高起潛牴牾及是疏請陛見遂嚴旨詰責時嗣昌已入閣矣督軍大學士劉宇亮失事被詰亦委咎傳庭詔下部院勘議傳庭申辨頗侵宇亮復責以郡邑失陷不得委卸傳庭大懼稱耳疾乞休帝不允嗣昌及言官交章劾其託疾帝遂發怒斥爲民下巡撫楊一僞覈直僞奏如傳庭言帝益怒并下一僞詔獄法司擬邊遠充軍不許傳庭兩疏乞哀且乞練火器自効亦不許十三年正月刑部尚書甄淑擬絞罪以上命長繫待決及文燦撫事壞嗣昌自出督師明年以陷藩封自盡帝漸思傳庭兵部尚書陳新甲薦之部議請釋罪錄用帝猶未許已而薦者益衆十五年

正月詔起兵部右侍郎召見傳庭指陳形勢帝喜勞獎甚至賜酒饌銀幣命督京軍救開封傳庭兼程馳赴會陝西總督汪喬年敗歿於襄城大將賀人龍潰入關中帝卽命傳庭往代且諭密誅人龍傳庭與巡撫張爾忠等謀召人龍斬之而撫定其部曲乃日夜治軍爲平賊計六月帝遣御史蘇京監延寧甘肅軍趨傳庭出關時承傳宗龍汪喬年兩敗後關中兵強半覆沒傳庭方募兵未堪用會開封圍久朝命嚴急乃以九月抵潼關大雨留旬餘始出關東而開封已陷李自成迎戰遇於郊縣之塚頭諸將高傑等逐北三十里羅汝才援自成過後部將左勦蕭慎鼎勦舊將光先子統袴不習戰望而怖曰前鋒沒矣遂奔衆大潰傳庭走鞏縣賊復入掠河南

府傳庭乃由孟縣入關執斬慎鼎而勦以光先故令出馬二千匹以贖是役也天大雨糧不至士卒採青柿以食凍且餒故大敗豫人所謂柿園之役也傳庭上章待罪帝令圖功自贖御史京言殘卒不及三千臣無軍可監謹席藁請命乃令巡按河南傳庭敗歸益募勇士開屯田繕器積粟令三家出一壯丁置火車三萬輛載火砲甲仗戰則驅之以拒馬止則環之以自衛督促苛急工人皆夜以繼日傳庭先為巡撫有所徵發以軍令從事吏民畏之以討賊故不敢怨及是物力愈絀法愈嚴民不能無怨十六年五月命兼督河南四川軍務大學士吳姓奉命督師已而不果乃進傳庭兵部尚書改稱督師加督山西湖廣貴州及江南北軍務賜尚方劍傳庭請以總兵牛成虎將前鋒高傑將中軍王定官撫民將延寧兵為後勁而以白廣恩統火車營檄左良玉赴汝寧夾擊廣恩傑皆降將桀驁不可使傳庭以其驍勇不得已用之關中連年旱荒民又苦征繕仕於朝者咸請趣傳庭出關帝亦急平賊頻責讓傳庭不得已乃謀出兵自成已據河南湖北十餘郡設官置戍而身居襄陽謀報自成將由內浙窺商維傳庭令陝西巡撫馮師孔率四川甘肅兵駐商而遣成虎以三千餘騎先趨雒陽至澠池與賊游兵遇擊走之傳庭乃以八月統大軍出賊先圍李際遇於登封之玉寨聞官軍出伏滋澗以待官軍見道險下馬搜伏賊乃走龍門北追及賊已走官軍遂駐龍門而別遣兵追賊汝州賊盡奔寶豐玉寨圍亦

解河南巡撫秦所式方轉餉河北聞自成盡發荆襄兵會於
汜水榮澤將北渡大懼請援於傳庭已而賊不至傳庭劾奏
之河南總兵卜從善擁軍河北觀望總兵陳永福逗遛郭家
灘傳庭並劾奏詔所式白衣視事貶從善永福爲副將九月
師次汝州僞都尉李養純降謀報賊老營在唐縣其僞將吏
屯寶豐傳庭乃遣將襲唐縣而自趨攻寶豐自成來援廣恩
傑夾擊再戰自成敗走遂克寶豐戮僞將吏他將亦克唐縣
盡獲其輜重師次郟縣賊萬騎逆戰復大破之幾獲自成軍
聲大振會天久雨道澀糧車不能前或勸退軍以就糧傳庭
曰師已行還亦飢矣不如破郟縣就食遂攻破郟縣窮邑也
得馬騾數百殺食之雨不止頓兵五日後軍譟於汝州陰通

賊賊大至官軍益飢困傳庭乃分軍三令廣恩由大道已與
傑由小道還軍迎糧而留永福爲後拒戒毋動前軍既移後
軍亂永福雖斬之不能止亦引退賊追及之二十一日官軍
還戰賊置陣五重飢民處外次步卒次馬軍又次驍騎以老
營家口處內官軍力戰已破其三重遇驍騎陣稍動壯士推
火車者未習戰駭曰師敗矣棄車走馬軍亦走車傾塞道馬
多絀於輶賊騎乘之其步卒或以大棒遮擊官軍官軍大敗
死者四萬餘人失亾輜重馬騾無算廣恩與傑不相能傑軍
敗望廣恩救廣恩已退九十里至汝州矣傳庭憤恨引佩刀
欲自殺左右力持之乃嘆息曰天下事去矣吾疾趨潼關收
潰兵固守賊或不至事尚可爲乃與傑以數千人走河北帝

聞敗大驚命充為事官戴罪自贖傳庭時已從山西渡河轉入潼關廣恩亦從之賊隨至傑曰我軍家屬悉在關中今戰敗思歸而強之守關危道也不如徑入西安憑堅城固守傳庭曰賊一入關則全秦糜沸秦人尚為我用乎細其言不納十月六日自成攻關廣恩戰敗傑憾廣恩不救傳庭登陴固守賊分兵從南山遠出其背夾攻官軍官軍大敗關城遂陷傳庭憤躍馬揮刀大呼衝入賊陣戰死年五十一後數日西安亦陷其妻張氏率三妾二女並赴井死時有言傳庭未死者帝命核實已而都城亡恤典竟不及

明史藁

列傳第一百三十九終

明史藁

列傳第一百四十

光祿大夫 經筵講官明史總裁戶部尚書加七級臣王鴻緒奉 敕編撰

徐從治

謝璉 孫元化

余大成

丘民仰

宋一鶴

蕭漢等

馮師孔

黃綱等

都任

林日瑞

蔡懋德

趙建極等

衛景瑗

朱之馮

陳士奇

王行儉 王錫

劉之勃

龍文光

徐從治字仲華海鹽人萬曆三十五年進士除桐城知縣築堤八萬餘丈以捍水災坐事貶武學教授屢遷南京禮部郎中濟南知府舉卓異遷竟東副使駐沂州天啓元年妖賊徐鴻儒反鄆城連陷鄒滕嶧縣伏黨沂州為內應從治捕得之

嚴兵守請起家居故總兵楊肇基主兵事而獻搗賊中堅之策於巡撫趙彥遂滅鴻儒事詳彥傳時副使王從義僉事來斯行並為監軍有功從治功最旋以右參政分守濟南錄功進右布政使督漕江南會餘孽復煽巡撫王惟儉奏留之尋告歸大計中浮言議調莊烈帝嗣位以故秩飭薊州兵備軍久缺餉諸營謀而甲巡撫王應豸及巡按總兵諭弗聽從治借總兵麻登雲馳入營給以三月餉卒欲給如額質登雲從治還告應豸勒兵逼之亂遂定時崇禎二年春也進秩左布政使請告歸四年起飭武德兵備孔有德反山東巡撫余大成檄從治監軍明年正月馳赴萊州而登州已陷大成削籍遂擢從治右副都御史代之與登萊巡撫謝璉並命詔璉駐

萊州從治駐青州調度兵食從治曰吾駐青不足鎮萊人心駐萊足係全齊命乃與璉同受事於萊有德遼人與耿仲明李九成毛承祿輩皆毛文龍帳下卒也文龍死走入登州登萊巡撫孫元化官遼久素言遼人可用乃用承祿為副將有德仲明為遊擊九成亦為偏裨且多收遼人為卒是年大凌河新城被圍部檄元化發勁卒泛海趨耀州鹽場示牽制有德詭言風逆逗遛乃命從陸赴寧遠十月晦有德及九成子千總應元統千餘人以行經月抵吳橋縣人罷市眾無所食宿一卒與諸生角有德笞之眾大譁九成先齎元化銀市馬塞上用盡無以還適至吳橋聞眾怨遂與應元謀率部卒劫有德有德從之還兵大掠陷陵縣臨邑商河殘齊東圍德平

既而舍去陷青城新城剽掠厭乃整衆東巡撫余大成者江寧人天啓時爲職方郎中嘗奏發大學士劉一燝私書齣之去大成亦移疾歸後魏忠賢黨名復其官而大成卒以事忤忠賢至削籍崇禎改元復起故官加太僕少卿有清執名遂由太常少卿擢右副都御史巡撫山東大成雖久居兵部軍旅非所長白蓮餘賊未靖又有逃兵之變不能討御史謝三賓宋賢先後詆之及聞有德叛託疾數日始遣中軍沈廷諭參將陶廷鑑往禦廷諭遇賊而走廷鑑復大敗大成乃移兵追賊而元化軍亦至元化字初陽嘉定縣人登鄉科從徐光啓游得西洋火器法天啓六年會試入都值廣寧覆沒條備京防邊二策告當事給事中侯震暘薦之朝又以孫承宗請

主建砲臺及教練法贊畫經略軍前元化因請據寧遠前屯以策干王在晉不能用又與袁崇煥爭在晉建重關之非承宗行邊還奏授兵部司務已而承宗代在晉築臺製砲如元化言召還爲職方主事崇煥守寧遠復命元化爲贊畫崇煥與在晉及滿桂相失元化還朝請以關外事專委崇煥惡崇煥者譖之魏忠賢罷其官崇禎元年起武選員外郎進職方郎中經略崇煥乞以自輔改山東右參議整飭寧前兵備京師戒嚴崇煥入援及下獄祖大壽潰還元化調劑令復入關朵顏乘虛犯寧錦遣將擊却之時永平失守關內外隔絕者半年餘軍食久虛將士單弱列城得無虞元化力也三年六月皮島副將劉興治爲亂廷議復設登萊巡撫遂擢元化

右僉都御史任之駐登州遣使諭定興治明年島衆亂興治被殺元化請以副將黃龍代先後汰其兵六千餘人及有德變大成所遣兵敗以撫自愚而元化亦力主撫檄賊所過郡縣毋邀擊賊長驅無敢加一矢者賊佯許元化降元化師次黃山館而返賊兵遂抵登州元化遣將張燾率遼兵駐城外總兵張可大發南兵拒賊元化猶招賊降賊不聽五年正月戰城東可大兵方勝燾遽退可大兵遂敗燾兵半降賊賊遣歸爲內應士民爭請勿容入元化不從賊俱闖入中軍耿仲明都司陳光福等夕舉火導賊自東門入城遂陷元化自刎不殊與參議宋光蘭僉事王徵及府縣官悉被執惟可大死之大成聞乃馳入萊州爲守禦計初登州被圍朝廷鑄大成元化三級令辦賊及登失守革元化職候勘而以謝璉代時有德推九成爲主已次之仲明又次之用巡撫關防檄州縣兵餉而令元化等移書大成求撫欲畀以登州一郡有德黨參將余五化力言撫可成大成爲聞於朝言官力攻之帝乃命革大成職候勘而以從治代當從治璉未受事時賊先已破黃縣知縣吳世揚死之已而攻萊從治璉與總兵楊御蕃等分陴守御蕃肇基子也積戰功至通州副總兵會登州陷兵部尚書熊明遇奏令署總兵官盡將山東兵與保定總兵劉國柱天津總兵王洪尅期並進遇賊新城洪先走御蕃拒兩日率二百騎突圍出遂入萊城從治璉倚以拒賊賊攻兩日不下大掠分兵陷平度知州陳所問自經死賊益攻萊用

元化所製大砲且日穴城城多頽從治等投火灌水穴者死無算又時出兵掩擊毀其砲臺斬獲多而明遇惑大成撫議命主事張國臣爲贊畫往撫并安輯遼人之在山東者以國臣遼人也國臣先遣廢將金一鯨入賊營已而國臣亦入爲賊移書且遣一鯨還懇毋出兵壞撫局從治等知其詐叱退一鯨遣間使三上疏言賊不可撫最後言萊城被圍五十日危如累卵日夜望援兵卒不至度必爲撫議所悞國臣致書臣內抄詔旨并兵部諭帖乃知部臣已據國臣報達聖聽夫國臣桑梓情重忍欺聖明而陷封疆其初遣一鯨入賊營何嘗有止兵不攻之事果止兵或稍退舍臣等何故不樂撫特國臣以撫爲賊解而賊實借撫爲緩兵計一鯨受賊賄對援師則誑言賊數萬不可輕進對諸將則誑言賊用西洋砲攻城將陷矣賴我招撫賊卽止攻夫一鯨三入賊營每入賊攻益急而國臣乃云賊稱我縋城下擊致彼之攻是使賊任意攻擊我不以一矢加遺如元化斷送登城然後可成國臣之撫耶當賊過青州大成擁兵三千追賊甚易元化遺書謂賊已就撫爾兵不可東大成遂止勿追致賊延蔓今賊視臣等猶元化乃爲賊解曰吳橋激變有因也一路封刃不殺也聞天子詔遂止攻掠也將誰欺盈廷中國臣妄報必謂一紙書賢於十萬兵援師不來職是故矣臣死當爲厲鬼以殺賊斷不敢以撫之一字謾至尊淆國是悞封疆而戕生命也疏入未報當是時外圍日急國柱洪及山東所調援軍俱頓昌邑

不敢進廷議兩撫臣並困圍城中止巡按御史王道純在外
乃議設總督以兵部右侍郎劉宇烈任之調薊門四川兵統
以總兵鄧玘調密雲兵統以副將牟文綬以右布政使楊作
楫監之令赴援三月宇烈道純作楫國柱洪玘及監視中官
呂直義勇副將劉澤清新兵參將劉永昌朱廷祿監紀推官
汪惟效等集昌邑玘國柱洪澤清等抵萊城馬步軍二萬五
千勢頗盛而宇烈無籌略諸帥皆懦怯抵沙河日遣使講撫
還所獲賊陳文才於是賊盡得虛實亦以撫愚宇烈而潛兵
繞其後盡焚輜重宇烈遂走青州撤三將兵就食玘等半夜
拔營散賊乘之大敗洪國柱走昌邑澤清抵萊城
接戰傷二指救不至亦敗回平度惟作楫不去三將旣敗朝

中譁然明遇知官兵不可用益堅撫議先是登州總兵可大
殉難以副將吳安邦繼之安邦尤怯鈍奉令屯寧海規取登
州仲明揚言以城歸安邦信之離登二十五里而軍中軍徐
樹聲薄城被執安邦走還登旣不能下而賊困萊久璉從治
御蕃日堅守待救至四月中旬從治中砲死萊愈益危山東
士官南京者合疏攻宇烈請益兵於是調昌平兵三千以總
兵陳洪範統之加以提督銜洪範遼人明遇猶冀定撫議也
天津舊將孫應龍自言與仲明兄弟善能令其縛有德九成
降巡撫鄭宗周子兵二千人令從海道往仲明乃偽函死人
首遺應龍曰此有德首也應龍率舟師抵水城賊迎入猝縛
斬之無一人脫者賊得巨艦兵益盛島帥黃龍攻賊不克而

還賊遂破招遠圍萊陽知縣梁衡固守賊敗去宇烈復至昌
邑洪範文綬等亦至萊州推官屈宜陽請入賊營講撫賊伴
禮之宜陽遣人言賊已受命宇烈奏得請乃手書諭賊令解
圍賊邀宇烈見宇烈慮劫不往遣營將嚴正中送龍亭過河
賊擁之去而遣宜陽還萊請文武官出城開讀卽解圍御蕃
及鄉官張忻等力言不可信璉謂圍且六月勢無如何遂借
監視中官徐得時翟昇知府朱萬年同出有德等皆叩頭涕
泣璉慰諭之而還明日賊遣宜陽入請璉邀御蕃同出御蕃
曰武臣第知殺賊何知撫事忻等復力言不可璉不聽復出
有德遂執璉等猝攻城却令萬年呼降萬年厲聲曰吾死矣
汝等宜固守罵不絕口而死賊知萊不可得送璉及二中官

至登幽之正中宜陽皆死初撫議興可大元化皆敗從治極
言不可獨宇烈與諸將信之而尚書明遇主其議至是舉朝
痛憤詔逮宇烈下獄調關外勁卒征之罷總督及登萊巡撫
不設專任代從治者朱大典明遇坐主撫誤國罷歸遂絕撫
議大典合兵攻萊八月中兵甫接賊輒大敗圍解有德等走
登九成方在登聞敗卽害璉及二中官大典圍登九成出戰
死久之城破有德仲明入海道生擒承祿等斬應元賊盡平
事詳大典傳詔贈從治兵部尚書賜祭葬廕錦衣百戶立祠
曰忠烈贈璉兵部右侍郎亦賜祭葬建祠廕子以御蕃功多
加署都督同知總兵鎮登萊而宇烈以次年遣戍璉字君實
監利人宇烈綿竹人大學士宇亮兄也本無才望謬畀重任

其戍也人以為失刑大成逮下獄遣戍赦還卒於家元化自賊所縱還詔逮之首輔周延儒謀脫其死不得則援其師徐光啓入閣共圖之卒不得同張燾棄市光蘭徵克軍

丘民仰字長白渭南人萬曆中舉於鄉以會試副榜歷原武寧晉二縣教諭遷順天東安知縣釐宿弊十二事河齧歲旱蝗並為文祭禱河他徙蝗亦盡甫八月調繁保定之新城崇禎二年縣被兵晨夕登陴守四方勤王軍畢出其地民仰調度有方民不知擾擢御史號敢言雲南土官普名聲作亂巡撫王伉不能定民仰劾伉挑釁逮治之李九成孔有德叛吳橋連陷六邑山東巡撫余大成登萊巡撫孫元化主撫民仰極論其非二人亦被逮流賊亂山西巡撫宋統殷專主撫下

令殺一賊者償二命賊愈張民仰疏論其罪并劾吏部尚書閔洪學用人不效洪學即去位統殷非久亦罷歸尋遭妻喪乞假旋里銓曹以其一榜出為河間知府遷天津副使調大同尋監軍汝寧遷永平右參政移督寧前兵備民仰善理劇故頻移要地十三年三月擢右僉都御史代方一藻巡撫遼東按行關外八城士馬甲仗軍糧多所規畫十四年春大清兵圍祖大壽於錦州民仰在寧遠徵兵轉餉至七月錦圍益急乃偕總督洪承疇進至松山為聲援八月王樸軍大潰未幾馬科等五將亦潰

大清兵遂進圍松山民仰與承疇誓死固守外援不至芻糧並竭至明年二月圍半年矣力不支城破承疇降民仰不屈

死贈右副都御史賜祭六壇官為營葬錄其一子尋命建祠
都城外與承疇並列帝將親臨致祭後聞承疇降乃止
宋一鶴宛平人為諸生見天下大亂即究心兵事崇禎三年
舉於鄉授教諭以薦遷丘縣知縣復以薦加東昌同知仍知
縣事巡按御史禹好善薦其知兵授兵部員外郎尋擢天津
兵備僉事改飭汝南兵備駐信陽總理熊文燦撫盜盜魁黃
三耀詣一鶴降順天王者與張獻忠羅汝才輩久亂中州其
黨劉喜才殺之亦降於一鶴一鶴先後勦劇賊斬首七百有
奇副將龍在田大破賊固始一鶴亦毒殺賊千人李萬慶降
一鶴定其眾數萬文燦屢上其功進副使調鄖陽河南巡按
高名衡奏留之不允獻忠汝才降久復叛於鄖襄一鶴至防

禦甚力楊嗣昌開府襄陽甚倚任之十年湖廣巡撫方孔炤
罷用嗣昌薦擢右僉都御史代之賊為諸將所逼多竄蜀地
一鶴以雲南軍移鎮當陽中官劉元斌以京軍移鎮荆門相
犄角及瑪瑙山捷一鶴亦叙功增俸汝才等五大營自蜀轉
至興山一鶴遣副將王允成孫應元等大破之豐邑坪斬首
三千餘級嗣昌稱為荆楚第一功獻忠陷襄陽與革裏眼左
金王等東萃黃州汝寧間一鶴請諸鎮兵皆不至乃移駐蘄
州焚舟遏賊渡賊移而北一鶴又斷橫江賊遂不敢渡嗣昌
卒朝命丁啓睿代一鶴不知連疏請設督師劾左良玉驕橫
復薦范景文吳牲惠世揚堪代嗣昌及啓睿破獻忠於麻城
左金王老回回等竄潛山懷寧山中啓睿一鶴及鳳陽總督

朱大典安慶巡撫鄭二陽合兵蹙之以捷聞一鶴又督參將王嘉謨等追破左金王爭世王治世王於燈草坪斬首千八百級十五年遣部將陳治等合江北兵共破賊之犯桐城舒城者一鶴起鄉舉不十年驟秉節鉞廷臣不能無枝御史衛周胤上疏醜詆一鶴亦連疏引疾帝疑其偽下所司嚴核先以襄陽陷奪職戴罪是年十一月許解官候代閏月汝寧圍命一鶴赴救方行城已陷十二月李自成復陷襄陽連陷德安荊州一鶴以獻陵為重急赴承天賊已驟至犯陵毀享殿歲除攻承天明年正月二日城陷一鶴自經巡按御史李振聲被執去自成以其同邑善養之後通書孫傳庭卒被殺總兵錢中選劄死留守沈壽崇承天知府王璣鍾祥知縣蕭漢

俱死之分巡副使張鳳翥當城將陷時奪圍出擊中三刀裹創走募兵竟以創重卒壽崇宣城人都督有容子崇禎元年舉武會試歷官興都留守忤巡按御史被劾罷未行而賊至佐一鶴城守罵賊死贈都督僉事廕子錦衣百戶璣扶風人舉於鄉由戶部郎中出為守擢鳳陽副使未行及於難漢字雲濤南豐人崇禎十年進士居官不徇請謁武備修舉十五年冬將入覲聞襄陽陷慨然請上官罷行賊薄城漢辭家廟授悅於妾媵曰男死忠女當死節佐一鶴拒賊殺傷甚多元旦突圍謁獻陵賊騎環之漢大呼鍾祥令在此若等不得驚陵寢賊挾之去漢延頸就刃遣使說降拒不聽明日城陷送漢吉祥寺令僧謹視之覓死具不得初五日於僧榻得一刺

刀乃書楊繼盛絕命詞於敝楮拾土塊畫鍾祥縣令蕭漢願死此寺十字於壁間卽自到血正濺字上賊嘉其義用錦衣斂而瘞之賊退其門人曰吾師肯服賊服乎悉易之詔贈漢大理寺丞

馮師孔字景魯原武人萬曆四十四年進士授刑部主事歷員外郎郎中恤刑陝西釋疑獄一百八十人天啓二年出爲真定知府舉治行卓異遷井陘兵備副使以憂歸崇禎二年起臨鞏兵備改固原再以憂歸侍郎謝陞署吏部事舉監司才堪督撫者十人師孔與焉服闋起懷來兵備副使移密雲忤鎮守中官鄧希詔撫他事劾之逮下吏抗疏辨竟削籍歸至十五年詔舉邊才用兵部侍郎張鏡心薦起故官監通州

軍勤王兵集都下剽劫公行割婦人首報功師孔大怒以其卒抵死拊凋殘輯士卒給事中熊汝霖等交章頌其功明年五月吏部尚書鄭三俊舉天下賢能方面官亦及師孔踰月擢右僉都御史代蔡官治巡撫陝西時總督孫傳庭將大舉討賊師孔主調兵食十月傳庭出關敗績李自成長驅破潼關不數日抵西安城下師孔厲兵拒守會偏將內應賊城遂陷師孔投井死按察使黃綱長安知縣吳從義秦府長史章尚綱指揮崔爾達並死之綱字季侯光州人天啓二年進士授南宮知縣崇禎中歷遷淮海兵備副使以憂歸七年流賊陷光州子彝如督家僮巷戰罵賊死其妹亦被難綱方省墓獲免服除起臨鞏兵備副使調番兵大破賊潼關原尋以右

參政分守洮岷擢陝西按察使甫一歲遇難自成勸之降叱曰潼關之戰汝我戮餘也今日肯降汝耶妻王先赴井死綱得間亦赴井死贈太常卿諡忠烈尚綱會稽人聞城陷投印井中冠服趨王府端禮門再拜自縊贈按察副使從義浙江山陰人崇禎十三年進士甫之官值比歲兵荒力請於上官委曲賑恤訓練丁壯三百人擊賊有功督師孫傳庭駐大軍西安征求百出從義令豪族均輸民力稍寬城陷從容下城釋戎服襲冠裳望闕叩頭投井死贈按察僉事爾達不知何許人亦赴井死有吏丘從周者長不滿三尺乘醉罵自成曰若一小民今妄踞王府將僭偽號而所爲暴虐若此何能久賊怒斫殺之而布政使陸之祺及里居吏部郎乾州宋企郊提學僉事真寧華焞皆降賊得大用

都任字弘若祥符人祖文奎知府父維新通判任舉萬曆四十一年進士授南京兵部主事進郎中屢遷四川右參政天啓五年大計貶江西僉事復屢遷陝西左布政使崇禎五年貶山東右參政再遷山西按察使任性剛嚴多忤物數貶謫終不變月朔諸僚約同朝晉王任曰會典朔望朝王惟都布二司不及按察按察得糾舉非法奈何與守土者同朝執不行巡按御史張孫振誣劾提學僉事袁繼咸任數慰問繼咸盡其行孫振復中以大計貶秩歸後起歷右布政使兼副使飭榆林兵備榆林天下雄鎮而地瘠民貧軍餉又久缺十六年九月巡撫崔源之罷去代者張鳳翼未至總兵王定從孫

傳庭東征大敗還遠近震驚自成遂據西安遣其將李過以精卒數萬來寇定懼詭言討河套逃去城中益空任急集軍民慷慨流涕諭以大義以廢將尤世威知兵延爲主帥與諸廢將數十人誓死固守督餉員外郎王家錄亦與焉賊遣使招降任斬之以徇自十一月望被圍堅守殺賊甚衆至二十七日城陷任猶巷戰力不支被執賊曰若好男子降我無憂富貴也任大罵不屈遂見殺世威等皆同死詳見世威傳中家錄黃岡人舉於鄉歷官刑部主事奏恤刑執審諸疏調戶部進員外郎出督延綏軍儲時已擢關南兵備僉事未行與任協守圍急男子皆乘城家錄命婦人運水灌城結爲水賊攻稍沮及城陷家錄自剄死

林日瑞字浴元詔安人萬曆四十四年進士歷廬州池州二府推官遷戶部主事進員外郎郎中崇禎四年出爲浙江右參議改江西右參政憂歸服闋起故官分守湖東屬縣鉛山界閩妖人聚山中謀不軌圍鉛山日瑞擊敗之搗其巢屢遷陝西左右布政使十五年六月遷右僉都御史代呂大器巡撫甘肅其年冬京師被兵疏請率師入衛帝念甘鎮要地令以副將代行青海賊挾賞擊走之明年十月李自成據關中分兵四出攻掠初犯寧夏官軍三却之殺其精卒數千賊走西安多散入河南及攻榆林榆林陷遂攻寧夏總兵官官撫民出降寧夏陷其別將賀錦犯蘭州州人開城迎賊賊遂渡黃河涼州莊浪二衛亦降卽進逼甘州日瑞聞賊急嚴兵且

結西羌以待廷議以爲不勝任遣楊汝經代之未至日瑞率副將郭天吉等扼賊河干十二月賊踏冰過直抵城下日瑞入城戰且守賊使諸生說降戮之以徇大雪士皆墮指守者引賊上城遂陷執日瑞詣錦誘以美官日瑞大罵被磔於市天吉及總兵官馬爌撫標中軍哈維新姚世儒監紀同知藍臺里居總兵官羅俊傑趙宦並死之福王時贈日瑞兵部尚書臺太僕少卿皆賜祭葬

蔡懋德字維立崑山人幼受書卽志聖學篤好王守仁書舉萬曆四十七年進士授杭州推官山東白蓮賊起浙中奸人亦殺長興知縣而是時調浙兵援遼兵不樂行謀爲變皆賴懋德籌畫事乃定天啓五年行取入都里人顧秉謙柄國欲

用爲吏部懋德不與通秉謙怒部擬給事中而旨改禮部儀制主事吏部尚書崔景榮請仍用懋德等爲言官旨復不許進祠祭員外郎都城建魏忠賢祠尚書率諸司謁賀獨懋德與同官翁鴻業中道託疾歸崇禎改元由主客郎中出爲江西提學副使頒守仁拔本塞源論於諸生自著管見臆說數千言發明良知之學士多興起遷浙江右參政分守嘉興湖州劇盜屠阿丑衆千餘出沒太湖當事議勦之懋德曰此可計擒也悉召瀕湖豪家把其罪簡壯士與同發遂擒阿丑當事以懋德爲知兵尊遭內艱去服除起井陘兵備久旱懋德禱卽雨他邑爭迎以禱又輒雨甫三月以遼東巡撫方一藻薦調官寧遠祖大壽久鎮遼部下頗不戢懋德諷之大壽爲

申約束中官高起潛倨甚懋德導以謙恭亦稍折節以守松山及修臺堡功數叙賚會災異求言懋德上省過治平二疏規切君相一時咸笑爲迂被旨切責楊嗣昌亦惡懋德言其清修弱質不宜邊地乃改濟南道濟南新殘破大之多缺入懋德攝兩司及三道印招流移安反側恤凋瘵諸廢畢興遷山東按察使河南右布政司田荒穀貴吏日急催科而賊流言先服者不輸租民日望其至懋德亟檄州縣停徵上疏自劾詔鑄七級仍視事十四年十二月擢右僉都御史巡撫山西召對稱旨賜酒饌銀幣明年春抵任大盜王冕等爲亂討平之總兵許定國援河南潰而歸懋德定其亂十月京師戒嚴卽統兵入衛詔扼守龍泉固關二關而賊已陷河南將犯

平陽境懋德亟馳河上禦之數月至十六年冬賊入潼關陝西盡陷自蒲州北抵保德二千餘里悉與賊鄰恃黃河爲限窮冬冰合賊騎得長驅懋德連章告急請禁旅及保定宣府大同兵馳赴河干合拒中朝亦以山西爲憂廷臣請防河者甚衆然無兵可援總兵周遇吉鎮寧武僅得自顧宣大總督王繼謨奉命防河亦不至懋德以疲卒三千當數十萬強寇日奔走平陽汾州間猶屢挫之大慶風陵吉鄉諸渡十二月尙嵐保德俱告警太原洶洶晉王手書趣懋德還懋德不得已分兵守二郡以十八日去平陽越三日賊卽渡河副使李士焜知府張嶙然等棄城先遁俄復還越二日李自成至嶙然迎降平陽遂陷十七年正月巡按御史汪宗友劾懋德不

待水泮遽還太原致名城淪覆詔奪官候勘以郭景昌代之
懋德先遣兵禦賊而屬城盡陷反拒官軍懋德乃與布政使
趙建極諸監司毛文炳蘭剛中畢拱辰太原知府孫康周署
陽曲縣事長史范志泰等大集城中人誓以死守懋德哭衆
皆哭聲震原野罷官命適至或請出城候代懋德不可曰吾
已辦一死矣景昌卽至吾亦與俱死是月晦賊游騎抵近郊
自成知懋德賢遣使招諭曰撫軍若降吾且大用懋德憤立
火其檄斬使人頭懸城上二月五日賊悉衆薄城遣部將牛
勇朱孔訓王永魁出戰俱敗歿明日自成具鹵簿督衆力攻
城上發砲擊之賊多死又明日晝晦大風拔木飄瓦終夜不
息守者皆仆懋德知不能支預草遺表時懋德調陽和兵三
千協守剛中慮其內應移之南關外果叛降賊而部將張雄
者守新南門與賊通懋德召中軍副總兵應時盛謀將調雄
守大南門未幾雄縋城出降語其黨曰城東南角樓貯火器
火藥我下卽焚樓樓焚守者悉走賊乘勢登城懋德北向再
拜出遺表付友人拔刀自剄爲麾下所奪時盛請下城巷戰
遂扶懋德上馬時盛持矛突殺殺數十人至炭市口賊騎充
斥時盛呼曰且擁公出西門懋德遽下馬曰我當死封疆汝
輩可自去衆復擁懋德上馬至水西門懋德叱曰汝輩欲陷
我不忠耶復下馬據地坐時盛已出城還顧不見復斫門入
語懋德曰請與公俱死遂偕至三立祠懋德就縊未絕時盛
釋甲加諸肩乃絕時盛再拜訖卽取弓絃自勒死建極危坐

公堂賊擁至晉王府見自成欲授以官叱曰我天朝方伯乃任賊耶自成令曳出斬之下堦連呼萬歲曰臣失守封疆死有餘罪自成以爲呼已也曳還問曰旣呼萬歲何不受官建極厲聲曰我呼當朝皇帝寧呼賊耶大罵自成立殺之文炳被執誘以官不從抗罵數日被殺妻趙妾李亦投井死于兆夢甫數歲被掠去士民以忠臣子贖而歸之剛中被執說之降大罵曰豈有蘭坦生屈膝求活者乎賊殺之首旣墮復躍起丈餘賊皆辟易拱辰被執賊適得新刀拱辰睨視之問何睨曰欲得此斫頭耳賊遂取斬之康周率死士巷戰被執說降不從乃見殺志泰不食死福王時議懋德不守河爲失策乃謚忠襄賜祭葬建祠不予贈賻餘賜卹有差建極河南永

寧人萬曆四十七年進士賊掠永寧時建極五子皆死後生三子又皆夭至是趙氏一門竟絕文炳字夢石鄭州人由進士歷知壽陽榆次擢吏科給事憂歸與有司禦賊以全城起故官會楊嗣昌督師議調民兵討賊文炳言民兵不若官軍乘快馬善避賊可守不可調帝從之當大計文炳言主計者喜奔競抑廉靜宜令吏部科道撫按得互糾不公者帝亦納之出爲山西兵備副使竟死剛中字坦生陵縣人崇禎四年進士由太常博士擢南京給事中奏保護留都六事已劾罷寧夏巡撫樊一蘅劾削河南解任巡撫常道立籍漕事大壞疏陳救弊之要山東游饑上疏言民死而丁存田荒而賦在安得不爲盜急宜清戶口并里甲帝多納其言遷山西副使

甫抵任卽殉城死拱辰字星伯掖縣人舉進士知朝邑鹽城
二縣數遷數貶歷淮徐兵備僉事督漕侍郎史可法謂拱辰
才不任乃移之冀寧康周字晉侯安丘人起家鄉舉志泰虞
城人時盛遼陽人起家小校至都督僉事慷慨仗義懋德深
倚之迄與同死當是時賊大破山西郡邑安邑知縣房之屏
宛平人起家鄉舉城陷北向拜天子入署拜母命妻子各自
盡遂投井未死賊曳出斬之忻州知州楊家龍字惕若曲陽
人由歲貢生爲寧鄉知縣民遭兵亾徙過半撫之七年皆復
業以薦遷官受事甫數旬賊卽至召語士民曰此城必不守
吾出若輩可全也挺身出城罵賊而死士民祠祀之汾州知
州侯君昭城破不屈死汾陽知縣劉必達當城破袖出罵賊

文被殺邑中義勇范奇芳竟刺殺僞都尉自剄死代州參將
閻夢夔鹿邑人城破抗節死寧武兵備副使王孕懋字有懷
霸州人第進士由太原知府遷自成旣陷太原遣使說降孕
懋斬之與總兵官周遇吉固守城陷自刎死妻楊投井殉之
寧武旣失三關皆陷賊遂長驅犯大同

衛景瑗字仲玉韓城人天啓五年進士授河南推官崇禎四
年徵授御史工部郎中靖科元以微罪獲重譴抗疏救之忤
旨切責尋劾首輔周延儒不納再劾其納賄行私數事語益
峻切復嚴旨詰責已劾吏部侍郎曾楚卿檢邪亦不納出按
直定諸府父喪不俟命徑歸服闋起故官楊嗣昌建議加賦
詔謂暫累吾民一年景瑗言輸將易盡蕩平無期恐累民不

已帝感其語爲申飭諸將給事中傅朝佑李汝璨以論溫體仁下吏景瑗力爲申救及召對復言兩臣忠愛乞宥之作敢言氣帝不懌左遷行人司正歷尙寶大理丞進少卿十五年二月擢右僉都御史巡撫大同歲饑且疫疏乞賑濟給牛種民獲甦乃戢豪宗蒐軍實練火器聲績甚著十七年正月李自成將犯山西宣大總督王繼謨檄大同總兵姜瓖扼之河上瓖潛遣部將李時華納款而還景瑗不知也及山西陷邀瓖歃血誓死守瓖布訛言衛巡撫秦人將應賊代王果疑之不與相見永慶王至射殺其僕會景瑗有足疾不時出兵事皆瓖主之瓖兄瑄以昌平總兵失律繫獄後赦出就瓖力勸降賊瓖虞卒不從人犒銀數兩不足則予布帛佯言勵將士

固守王及士民咸信之諸郡王分守城門瓖每門遣卒二百助守至三月朔賊抵城下瓖卽射殺永慶王開西門迎賊使人詐要景瑗議事景瑗乘馬出知有變自墜馬下俄爲賊所執見自成欲官之景瑗不屈據地坐大呼皇帝而哭賊義之曰忠臣也不殺景瑗猝起以頭觸階石血淋漓賊引出顧見瓖罵曰反賊與我盟而卽叛神其赦汝邪賊使景瑗母勸降曰母今年八十餘當自爲計兒國大臣不可不死母出景瑗謂人曰吾不罵賊者以全母也初六日自縊於僧寺賊歎爲忠臣移其妻子空舍戒毋犯福王時贈兵部尚書諡忠毅與朱之馮竝列正祀文臣中繼謨府谷人萬曆三十八年進士天啓中歷官薊州兵備參議魏忠賢黨倪文煥劾之削籍崇

禎時起易州兵備調遵化屢遷右僉都御史巡撫密雲爲給事中方士亮御史甯承勛劾罷薊鎮總兵官唐通言臣從軍二十年未見正直清廉憂國奉公若繼謨者帝怒切責通而士亮亦言恐代者未能勝繼謨帝遂留之旋以久勞加兵部右侍郎十六年九月移撫順天十二月代孫晉總督宣大山西軍務劾罷宣府總兵官唐鈺明年正月山西告警命繼謨發兵援未至而太原已陷及賊逼陽和繼謨知不能守遁入山中尋爲賊所得拷掠死分巡副使朱家仕盡驅妻妾子女入井而已從之一家死者十六人督儲郎中徐有聲山陰知縣李倬亦死之家仕河州人

朱之馮字樂三大興人天啓五年進士授戶部主事權稅河西務課贏留公帑無所私尋以外艱去崇禎二年起故官進員外郎坐累謫浙江布政司理問稍遷行人司副歷刑部郎中浙江驛傳僉事青州參議盜劫沂水民株連甚衆之馮捕得真盜大獄盡解禽治樂安土豪李中行權貴爲請不聽進副使齎表入都寄家屬濟南已而濟南破妻馮匿姑及子於他所而已從容投井死姑李聞之亦絕粒死之馮扶柩還廬墓側晨昏伏泣者三年服闋起河東副使所部鄰秦豫寇警日至大猾朱全宇潛通秦賊之馮令廢將謝鳴進執殺全宇部內以寧十六年正月擢右僉都御史巡撫宣府之馮自妻死不再娶亦不置妾媵一室蕭然畿內被兵統軍入衛帝遣中使慰勞賚銀幣司餉主事張碩抱以剋餉激變群縛之

之馮亟出撫諭貸商民貲給散而密捕誅首惡七人劾碩抱
下吏軍情帖然總兵唐鉅貪恣論罷之明年三月李自成陷
大同之馮集將吏於城樓設高皇帝位歃血誓死守盡出所
有犒士人心已散莫爲盡力監視中官杜勛總兵王承胤先
遣人納款叩頭請之馮以城下賊之馮大罵十一日賊將至
勛蟒袍鳴騶郊迎二十里外將士皆散走之馮登城太息見
大砲語左右爲我發之嘿無應者自起焚火或從後掣其肘
之馮撫膺歎曰不意人心至此俄賊薄城承胤遽開門降城
中人先聞訛言謂賊不殺人且免徭賦咸結綵焚香以迎左
右欲擁之馮出走叱之乃南向叩頭草遺表勸帝收人心培
氣節遂自縊死賊棄屍濠中濠傍羣犬日食人屍獨之馮無

損者福王時贈兵部尚書諡忠毅城中同死難者督糧通判
朱敏泰諸生姚時中投繯死副將甯龍罵賊死繫獄總兵官
董用文副將劉九卿及里居知縣申以孝並不屈死其他婦
女死義者十餘人

陳士奇字平人漳浦人也好學有文名舉天啓五年進士授
中書舍人崇禎四年考選當得臺諫其座主姚希孟方爲當
事所忌吏部尚書王永光遂抑授禮部主事文震孟疏論之
永光詭詞以免擢廣西提學僉事父憂歸服闋起重慶兵備
尋改貴州復督學政母憂闋起贛州兵備參議奸民爭地構
訟者十年士奇立剖平之進副使督四川學政兵事益棘廷
臣交章薦士奇知兵十五年七月擢右僉都御史代廖大奇

巡撫四川松潘兵以索餉叛聚衆數萬士奇諭以禍福成就撫搖黃賊十三家縱橫川東北十餘年殺掠軍民無算文少壯者面爲軍至數十萬士奇檄副使陳其赤葛徵奇參將趙榮貴等進討雖屢捷而賊不衰官軍亦不能制士奇本文人初督學政好與諸生談兵故朝議推之及秉節鉞反以文墨爲事軍政廢弛石砭女將秦良玉嘗圖全蜀形勢請益兵分守十三隘扼流寇奔突置不問明年十二月朝議知其不足任命龍文光代之召士奇他用方候代瑞王避闖賊自漢中來奔總兵官趙光遠擁兵二萬爲衛士民避難者又數萬突至保寧蜀人震駭士奇馳責光遠曰若退守陽平關爲吾捍衛不惜二萬金犒軍如頓此需厚餉吾頭可斷餉不可得也

光遠乃退兵陽平士奇與王約以三千騎入重慶明年四月文光受代士奇將行張獻忠已陷夔州全蜀震動士奇遂留駐重慶賊屯忠州葫蘆壩四十餘日乃左步右騎翼舟而上時參將曾英守涪州水路趙榮貴守梁山陸路六月遇賊並敗奔賊遂奪佛圖關陷涪州或言公已謝事宜去士奇不可徵援兵不至誓死固守十七日賊抵城下多擊傷二十日夜黑雲四布賊穴地轟城遂陷士奇及副使陳纁知府王行儉知縣王錫俱被執王亦與焉賊縛於教場將殺之忽雷雨晦冥獻忠仰而詬曰我殺人何與天事用大砲向天叢擊之俄而晴霽將行戮士奇大罵而死王亦遇害賊大集軍民三萬七千餘斫其臂遂犯成都纁本關南兵備副使護瑞王入蜀

遂遇害行儉字質行宜興人崇禎十年進士由刑部員外郎出爲重慶知府蜀地多寇重慶常宿重兵行儉撫馭有方民獲安業城陷爲賊轡死錫新建人崇禎十三年進士除巴縣知縣土寇彭長庚起長壽隣水間殺典史爲亂錫殲其魁搖黃賊來犯力戰却之斬其魁馬超至是賊圍城急蒙巨板穴城錫灌以熱油多死及被執大罵抉其齒罵不已捶膝使跪終不屈明日昇至教場罵益厲賊縛樹上射之又轡而烙之旣死復燬其骨指揮顧景聞城陷急入瑞王府以已所乘馬掖王乘之疾走遇賊被執見獻忠景曰寧殺吾無犯帝子賊怒王遇害景大罵而死

劉之勃字安侯鳳翔人崇禎七年進士授行人擢御史帝頗崇信二氏之勃言仙佛之道大要清靜慈悲陛下取其清靜者以治心慈悲者以救世是則大聖人作用非真向緇流羽客祈福祐也近者傳聞爲營殿閣修齋醮方今天下兵荒流移滿道土木齋醮之費實足救億萬人身命乞斥以養饑民佐軍需疏出時論避之俄上節財六議言先朝馬萬計草場止五六處今馬漸少場反增二倍可節省者一水衡工役費歲幾百萬近奉明旨朝廷不事興作而節慎庫額數襲爲常可節省者二諸鎮兵馬時敗潰而餉額不減虛伍必多可節省者三光祿宴享賜賚大抵從簡而監局廚役多冗濫可節省者四三吳織造澤潞機杼以及香蠟藥材陶器無歲不貢積之內爲廢物輸之下皆金錢可節省者五軍前監紀監軍

贊畫之官不可數計平時則以一人而糜千百人之餉臨敵
又以千百人而衛一人之身耗食兼耗兵可節省者六詔所
司議行等劾勦寇總督丁啓睿保定總督張慶臻河南巡撫
高名衡山東巡撫王公弼皆庸劣無能帝以臨敵不宜更易
不納其言御史徐殿臣兩疏論大學士魏照乘照乘力辨之
勃謂大臣不當爭辨帝責以妄議然照乘卒謝去又疏陳東
廠三弊言自東廠司緝訪而內五城外巡按以及刑部大理
皆不能舉其職此不便於官守奸民千里首告假捏姓名一
紙株連萬金立罄此不便於民生子弟訐父兄奴僕訐家主
部民訐官長東廠皆樂聞此不便於國體帝卽命飭行未幾
出按四川列城多遭亂之勃盡心撫綏十六年秋類報災異

力請緩賦省刑言失城之獄大辟至二十九人不能無冤乞
勅部速議容臣平反亦弭災一術時不能用明年正月張獻
忠大破川中郡邑四月聞都城失守人心益恟懼舉人楊鏘
劉道貞等謀擁蜀王至澍監國之勃不可躍入池中議乃寢
八月賊逼成都之勃與巡撫龍文光等分陴拒守總兵官劉
鎮藩出戰而敗賊遂穴城實以火藥又剝大木長數丈者合
之纏以帛貯藥向城樓之勃厲衆奮擊賊却二三里衆皆喜
以爲將去也初九日黎明火發北樓陷木石飛蔽天守陴者
皆散賊遂入城蜀王率妃妾投井死鎮藩出城赴水死之勃
等俱被執賊以之勃同鄉欲用之之勃勸以不殺百姓改邪
從正輔立蜀世子賊不從遂大罵而死時福王立於南京擢

之勃右僉都御史巡撫四川已不及聞矣文光馬平人天啓
 二年進士崇禎初歷吏部主事以憂歸起貴州提學僉事就
 遷兵備副使以才調川北參政擢右僉都御史代陳士奇巡
 撫四川甫聞命賊已逼成都自順慶馳赴之城陷賊盡驅文
 武將吏及軍民男婦於東門外將戮之忽有龍尾下垂賊以
 為瑞遂停刑文光卒不屈被戮於濯錦橋

八月朔賊入潛之樓與巡撫請文光善衣單引衣懸衣自隱
 匿遂負等藉辭置王至極溫園之障不可驅人獄中蕭以察
 忠大如川中滌呂四其間潛姓夫守人益出擊舉人豈繼
 陳暗救蕭容且平又亦再災一審劫
 代蕭蕭與首既言夫姓之燦大輯至
 十八人不請無家之

